

福建通志

第柒拾陸册
共壹百册

福建循吏傳卷一

宋一

連光裕閩縣人太宗朝知安州應山縣有功於民言閩中本鄉風土官其卒也應山人追思惠政迎柩以葬子正因家焉

黃懋閩人淳化中爲滄州臨津令初六宅使何承矩至滄州上屯田之議太宗意頗嚮之旣而河朔頻年霖雨河流湍溢妨民樹藝承矩又言宜因積潦蓄爲陂塘大作稻田以足食事未果行懋上言閩中本鄉風土惟種水田省功易就三五年內公私必獲大利太宗方勤農事命諸路講求水利得懋書大悅詔承矩往河北諸州按視還奏如懋言遂除懋大理寺丞屯田判官令佐承矩制置發戍兵萬八千人給其役凡雄英霸州平戎順安等軍輿堰六百里置斗門引淀水灌漑皆懋所經畫也先是武臣習攻戰恥於佃作懋建議時沮者頗衆初年種稻值霜不成謗益甚事幾爲罷懋以江東晚霜稻常九月熟河北霜早又地氣遲一月不能成實江東早

稻以七月熟取其種課令種之是年八月稻果大稔承矩載稻穗數車遣吏送闕下謗者乃息自懋開置屯田築隄儲水爲阻固其後緣邊塘澤益增廣之莞蒲蜃蛤之饒民賴其利焉

留從諲永春人從効諸弟也淳化中爲泗州長吏有清節官卑俸薄雖藜藿不充未嘗妄干人太宗聞之召赴闕特遷揚州觀察支使

葉賓字虞卿仙遊人登景德二年進士授潮州海陽主簿歷連州桂陽令廣州節度推官商人陳從吉鬻銅錢捕繫吏治急自誣已所鑄法應棄市賓鈐案狀不署曰是物非巧工不能爲從吉商也且無范鎔具請更覈果得真盜鑄者由是有能名補建州節度掌書記召除太子中允累遷太常博士歷屯田郎官出知永春南安兩縣

案閩書賓傳作知泉州誤

通判南劍州慶歷

五年卒年七十有九賓居官恬靜以文章廉恥課士以耕鑿善良訓民衣布茹蔬恬然自適有羨金則存庫以代正供絕無所染其治訟正其事則已不窮治之故所至人憚其明而不怨既老閒居籍族戚親疏以餘

財第而散之子任傳

傳即周曾祖

任字仲堪以賓致仕恩蔭授江州德化縣尉

歲餘乞便家事親補泉州司戶參軍持正不苟拂監司意自牒去職既歸侍父不離左右父歿窮山水娛詩酒以終其身傳登景祐元年進士調晉江縣尉終祕書省校書郎

劉若虛字叔揚閩縣人祖文濟閩王王審知以女妻之官終吏部郎中父甫仕吳越歸朝後以母老不就官若虛登咸平五年進士授大理評事索遷太常博士通判洪州大姓胡氏子殺人以厚資僱老貧者代抵獄且成若虛躬覈之得實捕胡氏子寘諸法瀕江民以漁爲生而土豪常半取之曰漁當吾田所也若虛案視奏除沿江田租縱民漁改屯田員外郎知邵武軍天禧三年卒於官子弈自有傳

徐奭字武卿建安人大中祥符五年進士廷試第一人歷著作郎直集賢院坐考試開封潛發封卷視之除監洪州酒稅天聖初通判蘇州時東南大水奭周視盡得水利舊跡乃築石塘九十里建橋十八所復良田數十萬

畝疏隱田者萬六千戶塘成遷兩浙轉運使入爲禮部郎中知制誥久之由內降除翰林學士權知開封府尋卒

陳儼字仲莊建陽人大中祥符元年進士除安福簿歲饑請郡發粟以賑守不聽遂上狀自劾開廩給民尋攝常熟令濬福山河以溉民田終泰州推官

蔡黃裳字叔文晉江人大中祥符元年進士厯知鳳翔府虢縣鳳翔守有親校虢人也招權納賄黃裳至縣先執校縛傳舍中乃謁守條其奸狀置諸法一府大驚已而改知建陽秩滿縣人遮畱許再任居建陽八年後爲鎮安軍節度推官以太子右贊善大夫致仕貧不能歸客陳州以席蔽戶誦詠不倦

謝徽晉江人大中祥符八年進士厯撫州臨川令轉漳州軍事判官除大理寺丞知龍溪縣徙知容州北流縣城郭倉庾廨舍道梁一皆新之就知雷州州人不知學徽葺孔子廟聚諸子弟教以儒術雷人業進士自

此始大豪李郁築城得古印立盜契奪民田百餘家五十年不能直有訴於徽者徽條其惡致以法尋通判福州盡購巨盜誅其黨諫議大夫方慎言守廣州辟改廣州通判徽廉取番舶輸官之利以招其徠及罷去夷人思之不忘擢知建州召知開封府祥符縣治愈有聲尋求便藩得海州會歲旱有蝗過境一宿抱樾死吏民驚歎爲異政之應皇祐五年卒於任徽嘗言厯任三十九年無小過失實由謹畏故能然也子仲規季成仲規皇祐元年進士調越州蕭山縣尉累遷太常博士知興化軍進本路轉運判官季成字子立蔭補太廟齋郎累遷衛尉寺丞熙寧初行保甲法以王安石薦換西頭供奉官內藏庫使出知宜州峒蠻侵叛悉討平之元祐中由南京作坊使知廉州浚湟備禦之具爲一路最移融邕二州邕管外寨戍兵歲物故常千餘人季成請以峒丁代戍而教之不失守備且可救死亡咸以爲便及卒邕人立廟祀之

張式字景則建安人天禧三年進士主閩縣簿調主將樂除祥符尉趙稹

將并州辟軍事判官積所爲有不可徐啓諭弗忤積以故聽而式亦以此稱長者改著作佐郎知古田縣遷太常博士知咸平縣呂夷簡罷相以許州觀察判官辟之會擇河北吏御史中丞舉式知洛州賜緋魚改虔州三司市紬絹十餘萬匹式以非經數拒之再知濠壽二州召爲開封府推官時宮中以私財爲佛寺置田疏罷止之趙元昊反時誘人出私財助軍誘多者得賞於是吏或劫富人出財式並疏罷終尙書祠部郎中老不治田宅所得祿置書遺子孫

李餘慶字昌宗連江人父慕玠祕書省著作佐郎餘慶以蔭授應天府法曹參軍遇事輒與留司爭留司賢之薦於朝改太常寺太祝知潮州歸安縣天聖閒遷太子中舍通判秀州築石隄自平望至吳江五十里以除水患州近鹽場餘慶請置華亭海鹽兩監以弭盜販歲收緡錢八十萬擢殿中丞以上書論事過鱉除守國子博士知常州爲政精明強果事至立斷久姦宿惡輒收之不貸至其化服則又撫循養息處之如平人卒於官初

餘慶得疾甚困有州醫博士多過惡常懼爲餘慶所發因其困進利藥以毒之服之洞泄不已勢已危餘廉察其奸使人扶舁坐廳事召醫博士杖殺之歸卧牀未及席而死就葬橫山州民填道瞻送相與圖像祠之子處常忠武軍節度推官處厚處道及處常子撰皆登第處厚厯知廬州提舉淮南等六路茶稅

處道字深之餘慶第五子也登治平四年進士初調陳州南頓縣尉改成州同谷令時轉運使與處道厚善知州孫京不法欲因處道自託處道不可京怒摺處道短無所得移知處州縉雲縣徐氏女自號菩薩家有井詭言能治病趙抃守杭亦信之嘗求其水由是羣無賴爲之助煽聲動數州所居成市處道捕徐杖之塞其井抃聞大驚旣而徐氏生子乃歎服厯德化令浦城丞有宦績徙知南雄州始興縣始興嶺外小邑前令多以富歸處道罷無南中一物束書而返晚爲興國軍錄事參軍年已老矣猶力治曹事無所苟凡數歲反重囚得免死者甚衆已而丐休子援爲鄂州武昌

縣尉迎養於官

撰字子約熙寧六年進士

案續通鑑長編以撰爲蘇州人而宋史撰子彌遠傳亦云蘇州吳縣人攷撰墓志言撰父處常

娶范氏司封員外郎元之女國博之喪諸孤無所歸范爲營室於蘇州故
今爲蘇人然彌遠作連江縣移學記云自三世祖出居越百年而歸是撰
家持僑寓於蘇其後仍歸連江史未之詳考耳調越州餘姚王簿有茶商夜行遇海舶鉦鼓偕鳴

疑爲盜持短兵格鬥殺傷十餘人繫蕭山獄久不能決趙抃守越州檄撰
攝縣事撰至視案牘卽得其情曰犯時不知在律勿論具聞於州杖遣之
抃器其能薦監揚州高郵酒稅移江州彭澤令彭澤俗喜訟而尙鬼撰一
導以信義訟日益稀巫覡有前期唱某日所災者已而果然民懼禍轉相
趨奉撰召羣巫於庭問以火起期日處所令將詣伺有不信抵罪羣巫恐
皆曰無有乃下令敢假鬼神造言惑衆者坐之人心悉安朝廷下括田令
轉運使欲多得匿戶羨田爲功撰持不可轉運使怒翼旦且行撰抱牘夜
徑造卧內轉運使驚問撰曰彭澤令以公事白願起視之抗論移時且請
就劾解印綬去轉運使度不可屈卒從之然猶未解是時王安禮以端明

殿學士知江寧府轉運使還以其狀告覲共搆撰罪安禮曰縣令乃敢與部使者爭衡此必介特有守士也亟呼吏對轉運使前草奏薦撰轉運使意沮而去曾布知青州辟置幕府撰少受業於布之兄鞏及從布辟鞏遺布書以幕府得忠信之士爲可喜礙吏部例格不行布移瀛州再辟爲州學教授元祐三年朝議遣使修復河流故道撰作修河賦二篇上之大概言河不可復究當時利害甚悉不報後卒如撰言未幾除太僕寺主簿紹聖四年欽聖太后出幸撰行馬御路東誤不引避爲殿中侍御史蔡蹈所劾貶監饒州德興縣酒稅徽宗卽位轉承議郎通判莫州改簽書泰寧軍節度判官值歲水災撰首議賑救民不知饑秩滿就差通判袁州撰浮沈州縣三十年不以淹滯介意或勸撰詣朝廷申理撰曰吾每以士人老不知退爲鑒今躬蹈之耶竟不往大觀三年除通判保州未行而卒子彌大彌遜彌正自有傳

黃孝先字子思浦城人嗜學能文舅楊億尤愛之第天聖二年進士調蘄

州廣濟尉改宿州司理盜有行劫死於路者盜子疑其黨殺之欲訴於官
黨誘其子同劫得財倍與之其子寢不言盜敗孝先曰是兒孱甚烏能劫
白守直其獄不聽會新太守董儲至如孝先議遂與部使者吳遵路以善
治獄薦遷大理寺丞知咸陽縣回鶻來朝過其邑有死者藁葬道左孝先
封冢表識之回鶻使回過其側無不流涕感其仁尋知漢州綿竹縣改殿
中丞西夏用兵詔蜀中稅緡錢孝先曰歲饑行此民益病矣請益州上其
不便朝廷從之改知孟州濟陽縣遷太常博士通判石州改知博州終於
官子好謙好信

吳師服字夢得甌寧人天聖八年由建安籍登進士第

案是時尚未析置甌寧縣詳見選舉

歷知蒙州儂智高犯境師服度州無城兵不能抗乃籍帑儲屬諸大姓使
輦而藏之且聽民避賊獨佩州印以守賊知無所得引去改知邵武軍
坐謫後事直以職方員外郎致仕元符中卒壽百歲子棡字顧道熙寧
六年進士歷開封府推官高麗自元豐後不修貢遣棡往諭德意使還擢

知開封府參遷工部侍郎改戶部坐事削秩出知單州奏立宓子賤巫馬

期二祠移知陳州大觀初知蘇州及河中成都二府召入奏事除兵部侍

郎尋拜龍圖閣直學士再鎮成都陞辭徽宗曰卿清謹循良故委重地後

知鄆州中山府卒棡子激使金被留遂為金官閩書云將命至金被留比還命官翰苑後遷待制知

深州 案中州集激仕金為翰林待制出知深州到官三日而卒則激固未嘗還朝也

趙誠字希平晉江人閩書作希中天聖五年進士歷撫州通判州有疑獄守刻

深趣上薄暮請判誠知翼日有赦故延讞實黎明赦果至獲免者眾改知

歸州州有淫祠曰巴王歲夕殺人以祭誠毀祠投像於江州東三十里有

新灘前後溺載不可計屢議疏鑿傍灘大姓射阻險之利輒以游言沮撓

誠條奏利害結廬視役既成人號趙江就所廬祠焉入為三司戶部判官

出知明州卒於官

吳評字正詞崇安人景祐元年進士調明州鄞縣尉歲大旱部使者以聚

斂故諱之評檢視一以實報參遷通判常州濬學溪自蘇州引湖水以資

灌漑民利之治平閒知懷安縣神宗朝召為太常少卿判太常禮院
 出知萊州復興水利以濟民尋奉祠趙抃陳襄蘇頌皆言評不宜置散地
 不報遂致仕官至中大夫

徐晞字仲齊莆田人父復初仁宗賜復官不受因命晞為祕書省校書郎

歷長溪海門二縣主簿改將樂尉擢武昌軍咸寧令閩書作咸寧令攷宋

寧當是咸寧之訛以母老請為湖州武康縣尉未幾拜太子洗馬年五十餘致仕

閉門讀書久之再召守國子監博士出為湖南轉運使積陞至大中大夫

晞質直清慎居官有能名所至聽訟必得其情下不得為奸民服其公

蔡高字君山仙遊人兄襄自有傳高登景祐元年進士調長溪縣尉

遷開封府太康縣主簿府尹吳遵路素剛高年少位卑獨不攝屈而得盡

其事遵路喜以為能未幾以疾卒於官一男二女皆幼縣之人哀其貧以

錢二百千為贖高妻程氏泣曰吾家素以廉為吏不可以此汙吾夫拒而

不受初高兄弟與歐陽修善高嘗語修曰天子以六科策天下士而學者

以記問應對爲事非古取士意乃晝夜苦學及其卒也囊發高遺稿得十數萬言皆當世要務踰年仁宗與大臣講天下利害有所更改高所言凡五六云

許稹仙遊人寶元元年進士

卽景祐五年

歷著作佐郎都官郎中通判德州仁

宗朝舉天下廉吏四十九人稹其一也除監察御史未造朝而卒故事身後該致仕恩者官爲究實乃殮稹子巽語弟賁巽曰人子不能自致功名希致仕恩以累亡者可乎遂不陳乞後巽賁巽皆相繼登第稹從子章字潛道登慶曆二年進士知建州除屯田郎中爲政善治煩劇而不問苛細所至有聲

陳鑄字師回興化人天聖五年進士康定初歷殿中丞知南雄州秩滿以母老不復之郡求通判福州母喪服除起通判陳州會州有水患鑄悉力拯援全活甚眾部使者上其勞改知潮州移汝州復移登州以恤刑聞賜敕書獎諭官至朝散大夫守光祿寺卿

曾公望字武邵晉江人集賢殿修撰會第五子也會見仲子公亮傳公望用會蔭補太廟齋郎嘗一試進士不第曰安能事此求合耶遂勉赴州縣調授明州鄞縣主簿是時朝廷用兵西方詔舉材吏可爲令關中者大臣薦公望可任卽拜衛尉寺丞知華州渭南縣縣之豪家多置磴以擅水利歲旱一勺不以與人公望至破磴渠水使與衆共凡溉民田千頃有奇累遷至虞部郎歷簽書寧海軍節度觀察判官杭州江隄壞水勢悍甚州守欲立辦隄役以屬公望公望卽自下諸縣調丁夫比至富陽富陽人欲逃役以撼衆公望鈎得倡議者捽致之罪衆懼且力隄亟成賜詔褒諭徒簽書奉國軍節度觀察判官丁母憂歸服除知舒州桐城縣改蘇州吳江縣擢知忠州民負官鹽十七萬有破產不足以償者或負以死至子孫猶償不釋公望奏罷之尋通判江州治平二年知光州值淮蔡饑流民間光州仁政日轉其境募富家出倉實以食之所活數百萬人明年卒於官年五十有七子三人孝綽光祿寺丞孝總大常寺丞孝蘊自有傳

呂濤字季玉晉江人景祐元年進士歷漳浦令改知潭州衡山縣徹淫祠以爲亭館通判宜州適儂智高入寇轉運使檄濤以兵會濤將二千入躡賊後俘獲爲多嘉祐中調開封府司錄內都知史志聰私役衛士伐木墮而死尉中侍御史韓縝請下開封案治故事府有獄司錄必白知府乃敢鞠於是多爲志聰地者濤獨窮治之志聰坐黜由是知名歷守潮懷二州累遷光祿寺卿卒子惠卿升卿和卿惟諒卿與兄弟異趣元符中爲温州軍事推官上書詆紹述新法之非崇寧三年編類元符章疏姓名諒卿以邪等入黨籍追官勒停亳州編管御書姦黨碑賜其兄惠卿惠卿自劾求罷乞令諒卿出籍諒卿遂廢錮終身紹興二年贈宣教郎官其家

林杞字卿材南安人天聖五年進士歷知康雅秦淄四州在秦州修築海埭復良田數千頃使者上課最爲淮南第一淄州圭田歲入之外例輸縑六百杞曰田植五穀縑何從出耶卻不受後以光祿寺卿致仕卒年九十有八

上官凝字成叔邵武人慶曆二年進士授池州銅陵縣丞部使者以苛察威下吏凝獨不屈使者怒捃撫無所得乃媿謝秩滿父老送至境上饋藥數器發之皆白金也凝追而返之曰吾爲尉不私汝汝奈何忍吾私耶六年調潭州司理參軍人無冤者屬縣解盜七人論死凝察牘辭覺其中二人非盜徐訊之果誣立直其枉皇祐初用薦爲桂州陽朔令歷知潭州攸縣江州湖口縣洪州分寧縣皆有聲移知密州安邱縣前殿中丞成向廢居在家素干請有司以侵漁小民致貲鉅萬及謁凝數使立堂下將窮治之事未行會其族人奔爲密州守向譖凝誣以罪奔信之上章劾凝追逮吏胥百餘輩驗治卒無狀奔悔爲向所賣乃辨析前章置酒謝過凝了不爲愠曰予知自愠而已時山東皆蝗旁邑皆害凝境上有鳥萬數羣食之歲獨大稔熙寧三年遷職方員外郎通判處州始至守持法峭深凝屢格其不便者其後守有措施必先眡凝意故政皆近厚未幾卒於官子塏均塏字彥明嘉祐二年進士官至太子中允廣南東路轉運判官均自有傳

塏子恂愷怡皆登第恂紹聖元年進士興化軍教授愷字正平元豐八年進士初調江寧府溧陽尉改蔡州新息尉遷濠州錄事參軍居官十餘年以廉正明決稱怡見孝義傳

方峻字景通莆田人天聖八年進士調建安主簿景祐初出爲福州司理歷職方屯田郎中出知潤州嘉祐中請老分司南京峻在潤有惠政程珣亟稱之嘗鑿井舍傍禱曰願子孫居官如此水卒贈金紫光祿大夫子士寧子容元宗

士寧字彥昌慶曆六年進士嘗知劍浦縣三司使蔡襄薦之官至都官郎中

子容字南圭登皇祐五年甲科歷知惠州蘇軾謫惠日子容調護甚力相與唱和軾稱子容有拔薤之政卽其時也子容孫略昉簡輿皆有宦績

略

略楊志

字作謀崇寧五年進士大觀中由秀州崇德縣尉遷修書局出

提舉廣東常平宣和初在京東以不附燕雲之議忤王黼貶知瓊州先是

瓊累政不治略下車之始恩威竝行勸諭黎蠻使不爲擾瓊人德之改知潮州建炎中丐祠歸雅喜積書有萬卷樓

昉字文耕以兄略奏補官紹興中知長溪縣以廉謹聞葉禹嘗對人稱其清貧遷潮州通判未上卒昉無室寓居華嚴寺中其喪也郡守鍾離松贈緡三百族人復出貲助焉

簡輿教授藤州以致知慎獨訓學者終長樂令自峻以清白傳家至略兄弟四世人謂不愧良吏後云

孫弈字景山閩縣人皇祐元年進士歷知南陵海陵二邑呂誨知開封薦知封邱誨爲御史中丞又薦爲御史臺主簿尋遷監察御史論新法不便爲鄧綰所劾出監陳州酒稅陳襄知杭州辟爲簽判襄在經筵薦士三十二人弈其一也襄言弈事行著於鄉閭節義信於朋友外雖樸淳中實強敏歷官所至以善政聞可謂循良之吏宜使當一路足以厚俗安民元祐初繫除福建轉運使

徐洪字孺興建安人父舉屯田郎中洪爲文長於辨說未冠聲號四方皇祐元年登進士調洪州司戶參軍不就退居大江之南凡八年以父命出爲撫州金谿主簿金谿富人錮山林之利數十年洪奪之以利貧民嘉祐元年移攝安遠令卒於官

邱與權建安人至和中爲蘇州崑山主簿時縣西民田漂沒奸人邀劫行旅吏莫能禁與權上五科於郡守一曰便舟楫二曰闢田疇三曰復租賦四曰止盜賊五曰禁奸商復築至和塘七十里達於郡民皆復業

謝麟字應之建安人嘉祐四年進士調虔州會昌令民有被酒者夜與仇鬪旣歸而所親殺之因誣仇麟知死者無子所親利其財一訊得實再調江陵府右首令縣苦江水爲患隄不可禦麟疊石障之自是人得安堵除著作佐郎權通判辰州會章惇爲荆湖北路察訪使經制南北江蠻拓置沅州表薦麟才可用熙寧七年遷太常博士換西上閣門副使知沅州兼緣邊溪峒都巡檢使麟以本州屯田無軍士應募乞依河州法發配罪人

耕作復招納溪蠻古誠等州二十三峒得戶二千七百有奇歲輸課米儲備遂充以勞轉東上閤門副使再任降勅獎諭賜銀絹二百元豐元年獠賊丁元鋒等犯辰溪逼沅州界麟且捕且招沅境以安就加客省引進副使遷一子官麟請添築託口小田古城奉愛四寨差戍兵綏輯人戶籍爲省民置博易務收買弓弩募人淘采溪江所產麩金以業游手蠲放城寨身丁稅詔皆從之四年改知誠州麟奏本州旁近戶口遠隸他州見有封疆不足城守乞增割形勢之地以控扼蠻蜚詔就瀕渠河貫保塞置渠陽縣隸之未幾還知沅州管勾沅州緣邊安撫公事廣西撫水州蠻羅世念蒙承想等作亂命麟赴廣西同御器械和斌經制宜州蠻洞事發在京驍騎兩營及江南福建兵三千五百人並聽麟節制至宜州選將屯控要地分兵進取安化州立賞購捕世念等世念等勢窘且畏麟威名遂率峒首領種落四千八百人出降得衣甲器械二萬并納生界思廣峒民戶千百四家擢領果州刺史徙知荆南府改知涇州權管勾涇原路經略使司事

元祐元年除四方館使充環慶路鈐轄兼知邠州尋換朝議大夫直祕閣
知潭州兼荆湖南路安撫鈐轄四年加直龍圖閣知廣州未幾復還潭州
仍兼安撫鈐轄先是渠陽蠻楊晟臺寇文村堡結西融州蠻騷擾兩路已
而邵州蠻乘閒竊發詔麟措置事平第功五等轉官支賜有差厯知江寧
鳳翔二府六年權知渭州加涇原路經略使夏人築城沒煙峽不時出入
誘誤官軍麟嚴守備不輕戰賊無所得而去八年除左朝散大夫權知桂
州融江有夷警戍兵從北來不習水土麟部土人使極南而北兵止屯近
郡賴以全者甚眾

黃莘字任道浦城人曾祖元吉仕江南李氏祖覺字民先景德二年登第
有詩名與楊億劉筠章得象宋祁等相唱和累官至殿中丞以清直聞父
孝綽抱德不仕僑居舒州之太湖人稱潛山先生莘擢皇祐五年進士第
調揚州天長主簿徙恩州清河令黃河舊在州境縣歲輸芻茭後河徙猶
賦之積逋四十萬皆貧戶都水使者督不已莘條列於朝悉蠲之時有旨

遣使寬恤民力欲一切罷河北驛傳之須於民者莘上言騷民故當禁而
事繫國信往來亦何得廢獨可具民所勞費以其數當稅役詔從之公私
皆便歲饑部使者不肯賑莘遂發寧化鎮倉所活甚眾秩滿改祕書省著
作佐郎知曹州濟陰縣神宗卽位就遷祕書丞廣濟河決勢感甚莘徇邑
人議破南隄以分水水去病鄰邑莘曰此於法甚重奚可以累他人亟自
劾宰相韓琦以下皆有論掾知冤句縣事張復禮請納官以贖之詔薄其
罪奪一官罷歸琦留守北都薦授國子監久之遷陝西提點刑獄駕部員
外郎汲逢坐市易事繫秦州詔獄逮累三百人主者幸有功慘覈巧詆給
言逢病故緩之莘攝州事亟遣醫診視得逢無恙狀乃檄問不實之由主
者情見趣竟獄不敢小出入逢得無冤召入尙書省爲職方員外郎賜緋
衣銀魚丐外知汝州哲宗卽位遷朝奉郎以足疾請致仕尋卒莘性諒直
勇於爲義布衣時聞舒州望江令豐有孚能吏以誣繫獄卽馳見轉運使
王素白其冤素立釋之莘故不識有孚有孚亦不知也嘗上疏論免役錢

不當及下戶人以爲知言始寓衛州晚徙鄆州須城遂家焉從子陞字進仲莘弟藝之子也登崇寧二年進士授濟州鄆城主簿歷知廬州合淝縣合淝當兵興之際一切供給賦取於民陞隨事力爭有不得已視其等衰而均之吏不得並緣爲姦擢知邵州改永州值湖南大旱米斗千錢陞旣發官廩賑之復勸富民出粟猶不足給乃請於宣撫使李綱願出諸司封樁粟以續之沾被一路所活數十萬人丙子冲佑崇道兩祠起知筠州積官至朝散大夫

王禹字景和崇安人皇祐元年進士歷知虔州零都縣俗囂訟難治禹一感以誠復圖古之義者列其事以誘勸之踰年訟息而民化縣南有泉灌田千頃忽生鉛錫使者聞之欲置官冶禹力爭不可事乃寢轉朝奉郎通判婺州子獻朝議大夫直徽猷閣

詹範字器之案寓惠集云嘉祐八年進士紹聖初知惠州時兵荒之後野

多暴骨範爲叢冢以掩之蘇軾謫居其地同僚畏章惇勢莫敢顧者範待

之甚厚時携具相就倡和軾嘗稱範仁厚君子其治行超卓類龔渤海云石亘字彥名同安人嘉祐八年進士充司農寺幹當公事官熙寧中淮浙江東饑從司農卿張諤請所至發庫廩場給散募收遺棄小兒所全活以口計淮浙七十餘萬江東三十餘萬有司劾其不循常法與諤俱罷亘曰使事有濟以惠民也若法承之敢逃罪耶官終殿中丞

謝詡字成甫建寧人幼聰穎絕倫皇祐中知軍宋咸課諸生於學宮詡年十四五試皆第一既冠登治平四年進士歷撫州臨川令人稱爲謝冰壺又稱爲謝銅釘言其清且剛也邑有千金隄漑田萬頃前令謝卿材創築詡增修之民有前謝後謝之謠豪俠閔通者三至庭而詡三治之不貸人謂令怒通遂誣通子爲盜詡竟直其寃移知臨江軍清江縣歲饑出郊發賑當除夕家人以書趣歸詡判紙尾曰歲節不歸第不飲數十盃酒耳我歸而民失食二者孰先後政和間知汀州卒贈宣奉大夫子徽字彥章紹聖元年進士元符三年復中宏詞科歷官宣德郎累遷河北提舉常平值

改鑄大錢黻言誘民爲奸利舊錢且盡不可忤蔡京意左遷通判虢州方
在道責監漳州稅出納惟謹轉運使行部至漳謂曰公嘗供奉赤墀何躬
行筦庫事耶黻曰乘田委吏聖人尙勤乃職黻敢憚勞後通判潭州改通
判興化軍以親老丐祠久之召除主客郎中假太常少卿接伴高麗使卒
年八十有四

林伸字伸之莆田人嘉祐二年進士熙寧中調永靜軍判官先是內侍程
昉除同監勾都水監丞建議請開胡盧河引水入新河鎮故道浸沒民田
不可勝計詔河北東路轉運司遣官相視轉運司以委伸程昉本王安石
所任勢燄傾一時眾莫敢言者伸還報新河身比舊河高一丈水勢趨下
不可以力勝昉洪水逆行滄景德棣四州俱被其害昉反誣伸沮壞河事
伸坐追一官勒停初伸按視還或謂伸曰位卑言峻是速禍矣伸曰伸知
爲民計不知爲身計雖去無憾也已而起廣州新會縣邑多諸司職田歲
歉伸放其租稅十之九吏持不可伸曰不過爲民一衝替耳人以爲辱我

以爲榮後果符吏言伸恬不爲意官終朝奉郎

陳闡字伯通仙遊人皇祐元年進士知武平縣洞獠久爲民患闡立斥堠練丁壯境內晏然辟監建州豐國監時廖恩嘯聚開嶺一路騷然安撫司檄闡經畫之復置水倉立鎖港均定八州鹽估在任六年歲課增三十六萬緡後知建州歲饑境內有競糶者令疑爲盜以狀白闡曰民饑爭食耳促出粟賑貸衆遂安調知萊州乞致仕累贈金紫光祿大夫子高少遊湖學補太學生第元符三年進士以祭酒龔原司業傅楫薦遷博士政和中建醫學遷太醫學司業累上封事忤蔡京罷歸

方次彭字公述興化人父詠再領鄉書不第嘗創義齋於虎蹲岡陳升之夏竦曾公亮未達時皆肄業焉次彭年十二喪父哀毀如成人與弟次臬次夔刻苦力學皇祐元年次彭登進士補劔浦主簿調福清改合州司理參軍與州將論辨疑獄雖屢見折不少屈除知長樂縣徙知舒州望江縣有爲盜所殺者尉坐其鄰獄具次彭疑而釋之旬日果獲真盜改著作郎

知泰州海陵縣歲大饑次彭悉心賑貸多所全活權知惠州移梅州首興
學校躬教導之自是梅人始有登第者秩滿士民乞留再任凡六年兩被
褒詔元祐初上章告老賜五品服以朝請郎致仕卒年七十有八贈中奉
大夫次皋元豐二年中諸科次夔熙寧三年第進士奉議郎次彭子六人
晞道字明之淪平四年進士知晉江縣原道安道同登元豐二年進士原
道從政郎官至循州龍川令安道至鎮潼軍節度掌書記辨道調古田縣
尉捕盜有聲醇道案八閩通志作次彭從子非是歷知南劍州清儉自持皆以父任補官
季深道宣和六年進士知晉江縣孫曰車曰翼辨道子也車崇寧四年恩

賜進士歷編修會要所檢閱官轉祕書省正字翼登崇寧五年進士歷宗
學博士提舉本路茶事知漳州有美政漳人德之曰煜曰渙醇道子也煜
紹興十二年特科潮州推官渙紹興二十一年登第封州教授縮深道子
也紹興十八年第進士知惠州海豐縣俸入悉以賙族黨之貧者少從里
儒陳氏學後買婢得陳女育如己出擇名族嫁之曾孫銓尤知名淳熙二

年登第歷宰懷安遷湖南提刑司幹辦公事多所贊助累遷知泉州入爲宗正寺丞歷吏部郎中朱子守潭州同監司列薦於朝終直寶謨閣大理少卿公袞字汝補次彭從弟元豐初以布衣召見條奏十事曰教胄子舉實才獎清吏擢恬退禁鼓鑄嚴茶商恤民困寬州縣減丁錢益戶口神宗嘉納命爲潮州教授尋第二年進士擢諸王宮教授韓琦嘗語曾公亮曰方公袞論事剴切正而不阿立己公忠清而不撓豈多得哉

葉安節字亨之浦城人治平四年進士調饒州樂平縣尉改明州鄞縣主簿縣有海晏太邱靈巖三鄉介山谷間王安石宰鄞時嘗鑿巖起斗門於海濱未就而去安節踵成之三鄉遂饒改知越州諸暨縣通判岢嵐軍辟勾當陝西轉運使公事召爲韓冀王宮學教授遷太府寺丞出知吉袁二州所至鈎考摘發政號神明

林黃中字伯玉晉江人父皋治平四年進士爲建州司理剖雪獄囚註誤不受賞格黃中第元豐八年進士調信州丞豐縣尉有張生者貧負利黃

中密以俸代其輸已而張生擢第遷惠州歸善令有院僧與豪民爭田各持嘉祐契券歲月皆同先後令不能決黃中遣吏取架閣文字嘉祐年者審之紙札與僧契同豪民伏辜改知徐州彭城縣彭城號盜區訟數黃中治甫半年獄空幾兩月部使者以聞得獎論

劉衍字成之龍溪人治平二年進士歷英州推官應材識兼茂科以策論

新法報罷後以薦知潮州潮陽縣歲大歉發帑以賑不足傾家貲運米繼

之民得不饑元祐元年改知新州禦妖賊有功特授朝郎案漳州府志作加騎都尉秩

滿詣京師會知杭州趙抃同日引見與王安石議青苗不合衍抗辭折之

八閩通志云安石叱之曰公等坐不讀書故耳遂力乞致仕年纔三十八

累辟不起自扁其亭曰樂全與郭祥正徜徉其間壽八十餘乃卒

陳大卞字仲循仙遊人治平四年進士調常州宜興縣尉遷武平令歷汀

州錄事參軍知江寧府江寧縣以廉潔稱除威武軍簽書判官賜五品服

初大卞與章惇有舊及惇當國屢招以書不往以明堂恩得封二親拜且

泣曰吾不能與時俯仰黽勉仕宦者正爲吾親耳今恩封既逮可以休矣遂致仕時年五十六子三人安仁元祐六年第進士官至江寧府法曹性仁大觀三年進士官至奉議郎建昌軍南城縣顯仁字藏用徙居莆田登紹聖元年進士調古田縣尉改秀州教授兩除睦宗北宅宗學博士攝宗正少卿初大卞著萬言書未及上而卒宣和初顯仁獻其書不報屢乞外補除直祕閣知潭州官至朝議大夫

夏璩字幾道福清人熙寧六年進士初令仙居上言青苗之法不便於民擢權知制誥直學士院出知梧州兼管內勸農事有惠政母老告養以朝請大夫致仕子之邵之文重和元年同榜進士之邵初爲南劍法曹有平寇功歷江西提刑進階通議大夫之文太常博士提舉浙西常平案官江西提刑副使所至有聲

潘鯁字昌言長樂人曾祖吉甫仕吳越歸宋終國子博士祖衢知黃州遂家焉比鯁長復歸閩登元豐二年進士初調蘄州蘄水縣尉民有以花爲

獻者鯁一嗅而還之曰受賜多矣其廉潔類此遷知州防禦推官知江州
瑞昌郡賦屬縣鬻建茶守問君瑞昌歲可售若干鯁曰四斤耳守詰其說
鯁曰縣小民貧米鹽猶不足而暇及茶乎獨縣僚四人一斤可矣守悟以
故諸縣皆得無多售後七年以事過瑞有兩民拜馬前其一曰異時君爲
縣我訟得直其一曰君刑我當罪我心服是以偕來徙監楚州都鹽倉尋
爲吉州軍事推官元祐赦民負官錢無姦者悉免之通判攝守事悉下負
者於獄將鞫其姦鯁曰赦欲寬之而君故獄之耶執不可民賴以免龍泉
令捕得私釀三十家將上府鯁謂令曰是法皆當徒龍泉小邑一日徒三
十人君爲令安平令乃頗減出之改監漢陽軍酒稅遂以奉議郎致仕仍
居於黃子大臨字邠老以詩名於時

何述字明道浦城人元豐二年進士歷知太平州當塗縣縣瀕江述築隄
姑溪上以捍水患廣濟圩爲田千餘頃夏淫潦隄將決述別爲長隄輔之
崇寧初除開封府推官從府尹入朝以職事得賜對徽宗顧尹曰何述詳

雅必能助剽決擢通判索遷徽猷閣待制知永興軍移帥涇原以恩信結諸酋豪邊陲無警尋丐祠卒

祖秀實字去華浦城人父洽登熙寧六年進士秀實弱冠由鄉薦貢入太學宣和二年由上舍生釋褐第一人賜及第除國子監博士靖康二年金兵陷京師其酋入太學索米秀實叱之酋擊以劍絕而復甦高宗立聞秀實名召拜禮部郎中索遷中書舍人車駕駐蹕揚杭二州及幸會稽皆扈從張浚爲恢復計以朝廷主和議力求補外除直龍圖閣出爲福建轉運使賊入率先諸路丐祠養母尋起提點廣東刑獄專以修教化勵名節爲務復以母老請祠改知泉州未赴丁母憂服除知衢州值歲歉募民修城或爭之曰吾出粟募民民得食而吾又得其用何爲不可召除禮部侍郎辭歸而卒年七十積階至朝議大夫孫世英字穎仲年十七領鄉薦紹興三十年擢進士張浚開府建康世英上樸論十篇浚留置幕中調池州貴池主簿教授衡州課士一遵胡瑗遺法改知洪州南昌縣南昌爲江西劇

邑世英嚴立條教不以役攝民不以獄委吏發奸摘伏令信於下歲饑散
常平米數萬賑之區畫悉有條理通判融州薦知容州卒之日宅無一區
產無十金世稱爲清白吏
李規字師正松溪人元豐五年進士初辟陶節夫幕府時朝廷方討西夏
協力裨贊招散亡築堡寨夏人遁擢通判環州請革陝西錢法之弊改夔
州轉運判官移本路提刑被旨按獄原釋數百人以平瀘功轉朝議大夫
積階至中奉大夫子文淵字深道以父恩補陝州湖城主簿攝魏州盧氏
令中使過縣裁物價游手輩挾勢侵商賈文淵爲禁戢得無擾移開封府
東明主簿方田均稅法行文淵當開封祥符中牟三邑多權貴豪族皆斂
避莫敢奸號爲平允調鄭州滎澤縣丞用薦改通直郎知杭州富陽縣有
惠政未及代遭父憂因卜縣之白昇山以葬縣民相率來助有出財者文
淵悉謝之方臘之亂民爲密護其邱隴得不犯服除知明州鄞縣權接伴
高麗奉表使人出戍卒當給犒賞羣吏有所要索卒譁噪於庭守愕眙不

敢問文淵馳入好諭之請置吏於法郡以無事縣西有廣德湖延袤數十
里漑二千餘頃廢以爲田給高麗供備之費文淵得唐太和中復湖事跡
及熙寧中曾鞏所撰修湖記上於朝請以還民奏且下值靖康之難而文
淵亦以母憂解官不果紹興改元高麗遣奉表官崔維清至以文淵舊嘗
與其使接復爲引伴至行朝且命送之逾年以省員罷丐祠主管武夷山
沖佑觀高宗駐蹕臨安議者請嚴海道之備侍從官奏文淵嘗貳明州熟
悉海道利病詔復添差通判明州兼沿海制置司參議官文淵上備禦策
以爲異時諸郡四封立塢壁設馬窰拘保甲文具也當募土豪率鄉社因
民俗器械以地險爲計海道雖亘數千里其要害不過數處宜用舟師如
通之東簽料角平江黃牛塚頭是也於是臺諫皆言文淵說可信乞盡付
之以責其效是歲高宗下詔親征遂命文淵措置防托海道總舟師駐許
浦未幾移戍通州之崇明七年改知南劍州十年夏六月金人渝平朝廷
大講守備侍從臺諫各舉所知復以文淵應詔時文淵尙未赴南劍被召

至行闕間以海道事宜適舊相張浚為福建安撫大使招降海寇得多漿
船五十三艘兵將二千五百人獻於朝乞付文淵節制薦之尤力秦檜當
國忌不已出特抑之仍以文淵參議沿海制置司文淵移駐京口撫馭招
降之人與諸軍兵上下甚肅海道帖然事息莫有論其功者文淵曰吾知
赴新任而已越二年代還除知虔州兼管內安撫南雄兵甲司十六年卒
年六十有二積官至右朝請大夫文淵少習為文慕唐韓愈之為人喜其
所作老猶成誦召對論事敷奏詳雅嘗言褒寵節義修明政事然後可復
境土且乞郡守以三年為任所陳皆中機宜然不肯附麗以就功名子二
人大卞知澧州大正潼州路提點刑獄

吳居仁字溫父建陽人曾祖睿

八閩通志作父睿非選舉志入
甌寧縣蓋建陽人而甌寧籍者知侯官縣

有廉聲居仁以特科補官調古田尉轉潭州攸縣丞改融州節度推官所
至勤於職業聽訟以人倫大義斷曲直部使者下其所斷為州縣式居官
常俸不足自給自攸縣將歸口囊橐罄乏邑長以富民之訟產者委居仁

且曰行計可辦矣居仁笑曰此言何爲至我哉遂徒步去

吳仲虎字公炳崇安人元豐五年進士既登第舉其故田悉與宗族初調容州司理有商夜宿旅舍同邸殺人者逃去吏執商商因自誣服仲虎白於守請緩其獄已而果獲殺人者遷石州通判權知岳州子必明字若愚用蔭調侯官縣丞後通判汀州未赴除知邵武軍官終朝奉大夫廣東提舉

蔡元方字安禮將樂人熙寧九年同進士出身調饒州番陽主簿移懷安令轉惠州博羅令知建昌軍南豐縣歲適大饑流亡孳踣者相枕藉元方設法賑之全活者甚眾其爲政彊敏與民爲條約而不可犯然簡節疏目民亦易避之至於破姦剔蠹必鋤盡根故所至有風績紹聖四年卒於官翁邵字好德初名醇順昌人登元豐八年進士篤信好古博學工文調崇安縣尉時劉韜在布衣邵待以國士禮遷福清縣丞清慎方正大興學校當路聞其名欲羅致之檄至公堂猶責以苛禮邵拂衣起有棄官意

檄者愧悔委曲慰安之已而以疾歸里縣令俞偉大興學校屈邵主講席
邵牢讓不出友人楊時貽書敦譬不得已應之數州之士負篋雲集官至
宣教郎

謝伯宜字晞聖龍溪人熙寧六年進士歷知湖州長興縣開濬水利蝗不
入境諸臺以聞遷奉議郎賜緋仕凡六任司議讞者四平反爲多家居嘗
疏九十九坑水築海成田由是八九都皆成沃土都人祠祀之曾孫明之
字維學紹熙元年進士調雷州教授被檄攝守取印函之不視州事每潮
守注闕輒曰不如謝通判尋知扈州秩滿還家以詩酒自娛

吳與字可權漳浦人元豐五年進士歷端州四會縣令改饒州餘干徒學
於琵琶洲後登科者接踵劉正夫稱其護士如元氣決訟如神明人以爲
不虛嘗謁提刑使者燕若蒙論事侃侃不阿若蒙厲聲曰而欲效漢唐令
耶與曰固學之恨不至耳若蒙爲之改容移知懷安縣累遷奉議郎通判
潮州時故人張商英當國或諷之使見與毅然曰吾遇天覺於放逐中諄

諄勉以忠義今可呈身求進耶竟不往官終廣南東路提點刑獄

案江西通志名

宦引餘干志云吳與大觀初爲御史各志皆失載附錄備考

生平歷官凡七任悉以俸餘市書所藏至

三萬餘卷鄭樵稱海內藏書者四家以與所藏本爲最善王邁作清漳進

士題名記於漳先達器識名節首稱與及高登謂自國初至今科目得士

二百五十餘人獨二公所立光明俊偉一言一動可爲千載矜式

吳點字聖與邵武人總角時以文見鄉先生黃履進退如成人履嘆賞彌

日曰子必爲令器聞王安石在江寧治經負笈從之文益進擢元豐五年

進士調舒州司理參軍吏以點年少易之有市醫砭人死繫月餘未決點

一見曰此非律所謂誤不知方者耶吏相顧大驚移知英州真陽縣嶺海

去朝廷遠令多版授郡守率以胥遇之點始至左右風點庭趨點不爲屈

守怒欲寤以事久而知其賢反薦諸朝韓宗道知杭州奏知富陽縣政績

爲一路最時孫傑察訪東南官吏皆重足事之點守正不阿傑獨薦點可

用徽宗登極轉奉議郎賜緋衣銀魚擢太僕寺丞初點與蔡京有舊及京

拜右僕射點恥由其黨進力求補外京哂曰君欲首爲去國之人耶曠之
除通判婺州行未半途差撥發福建路錢物舊時當是選者事已必歸報
補美官點至陳畱以記白部曹不見京而去京滋不悅遷通判睦州秩滿
移越州遂請老貧不能歸寓居蘭溪御史中丞吳執中知其賢薦起再任
點不得已至京師會有同年生在堂廟欲引點入觀點固辭曰吾嘗謝事
矣豈可復見天子乎得通判洪州徑出關時茶法初下詔責有司奉行甚
迫點獨條上不便於民者數事人皆爲點危點不恤也已而朝廷施行其
說百姓賴之秩將滿以病告得主管衡州露仙觀歷奉祠十餘年不出欽
宗受禪賜三品服擢知潭州復請老建炎四年卒年七十有四官自宣德
郎十一遷至中大夫點退然如中人而操履剛方堅比金石自少至老清
苦刻勵無幾微不平意其舉進士出京師也僕遭癘疾同行皆惡之欲委
諸道點輟已所乘輿載之徒步走千里而歸人以爲盛德

上官恢字闕中邵武人元豐八年進士授潮州司戶參軍調賀州富川令

用薦知太平蕪湖縣遷通判吉州崇寧五年詔宰執擇河朔守臣除知深州丁內艱歸服闋起知南劍州移知徽州州當兵燬之後瘡痍未復恢專務仁愛多所寬貸有甚不可者乃峻臨之吏民畏服晚丐祠里居胡安國上書宰相言恢諸歷世務端重有守宰相遂以恢與楊時同薦積官至中大夫子模曾孫基皆有名

模字規仲以蔭補官初調臨江軍儀曹轉開封府封邱縣尉移楚州土曹遷知江寧府句容縣通判撫州適崇仁宜黃兩縣盜起勢張甚帥司檄模勦討模召諸將密授方略分據要衝而潛兵直搗其巢賊酋就擒餘黨遂潰事聞降詔褒獎

基字仲立乾道初以恢遺澤補官授潭州安化縣尉不赴召監建康府倉以母憂去服闋除贛州興國縣丞值歲歉縣令欲候大吏報可始發賑基曰民無食旦夕死何能久待如有譴基願身當之令依其言全活甚眾秩滿調衢州推官州欠上司及大軍緡錢守迫輸期謀於基基曰衡陽皆巨

胥攬稅民已納而胥不以報官故至此守卽委基監稅基揭欠戶姓名於市第等立限攬稅者懼罪不數日輸及萬緡丞相趙汝愚謫零陵行至衡陽卒時韓侂胥用事延途迂送汝愚者皆獲譴至是臺司不敢過而問焉基與汝愚無雅素獨爲經紀其喪已而郡守錢鏊上其治行累遷提點鑄錢司檢踏官嘉定元年卒汝愚子崇度過守邵武於其葬也臨穴哭之甚哀

朱蒙正字養源邵武人少豪邁旣長折節讀書舅黃履奇之登元豐八年進士乙科調揚州江都主簿性識強敏每聽訟必得情而後斷令知其能縣事悉委決焉遷南康軍都昌縣丞尋調衡州茶陵縣丞茶陵劇邑久闕令倉庾圯壞吏緣爲姦蒙正領縣事歎曰此令丞職也亟命構葺謹視出入姦弊遂絕租賦皆不督而辦歲旱每出禱雨輒隨車霑足人以爲誠感元符三年秩滿辟知定州安喜縣先是蒙正在茶陵守正不阿爲當路所不悅旣去堵撫細故以法中之坐奪官大觀初始雪前事除知開封府長

垣縣差通判火山軍秩滿造朝權司農寺丞出通判德順軍賜五品服政
和四年以疾丐歸明年從官薦蒙正康強有守得旨差提點信州上清宮
改成都長生觀蒙正廉慎質直恂恂如不能言而曾中是非了然自負欲
有所為仕宦齟齬卒不如意

鄒斐初名夔字堯叟

案楊龜山文集與鄒堯叟書原注云堯叟名夔劉執中增而墓志及哀辭則云名斐字堯叟是夔乃初名也

也秦寧人少工詞賦比壯從閩縣劉彝學彝奇其才以女妻之益博通六

經及百氏之書遂以文章名於時熙寧六年第進士

案諸志皆作熙寧六年龜山集墓志及哀

辭作嘉祐間登第

調淮陽軍司理參軍郡守杖一卒卒不服而肆言守將斬之以

事付斐斐執不可守益怒斐曰事在有司矧有常法力爭不移後歷劍浦

主簿監建州買納茶場遷福清令爾薦改知宣州宣城縣元祐四年卒於

官年五十有八斐厚重寡言雖家人不見其喜愠遇事堅正不可以非義

屈其決獄聽訟鈎考簿書人觀之若不勝其煩斐處之裕如手未嘗釋卷

也先是將樂楊時為童髻已誦斐文及元豐閒斐以家難寄居時里中反

折輩行與時交其卒也時深痛惜之謂斐學充其志而用不究其才云第
栝字仲發紹聖元年進士歷寧化縣令民爲之立祠刻石後知亳州值蔡
京當國謝病歸閒居二十年及李綱在朝貽書勸之仕亦不出
葉確仙遊人元豐八年進士時蔡京當國確爲內姻未嘗一詣其門後擬
除確蘇州欲一見然後上請確挂冠去官終河北提舉

陳侁字後之閩縣人元符三年進士授江州德安縣主簿侁素與陳瓘友
善瓘在諫省有所彈劾多侁所裨益久之調和州司戶州有獄不應死守
欲殺之侁抱牘與辯良久守怒以辭氣相加侁色平言莊徐理前語卒得
平反而退同列有唁者侁曰歷陽太守叱司戶何預我哉監在京河南炭
場凡五年率漏未盡十刻出莅局午而歸嘗語人曰吾爲祿仕敢不盡職
然居今惟此官爲易塞責爾用薦者改宣教郎充洪州錄事州吏何爽爲
姦利前後數守爽惟摘紙尾請書判侁發其姦付司理自此一府竦然承
聽宣和三年代且至以疾卒於官侁明於興衰治亂大勢當建中靖國初

朝廷更張政事侁移書侍郎鄒浩略言天下事元祐引而西北紹聖引而東南今復引而爲元祐矣僕之私憂將恐有甚於紹聖者後黨錮起如侁言子長方

雷覺民字將道建安人登紹聖元年進士初調漳浦尉改潮州錄事郡守給軍糧不時諸軍譁於庭覺民諭之曰郡實空乏吾今以經制錢代給設府公不吾聽吾當積吾俸償之諸軍感謝而退遷知曹州南華縣丁母憂廬墓三年歷通判本州未老丐祠卒年九十有五覺民嘗於官所遣女嫁置一婢旣知爲宦家女惻然爲擇賢士輟女匳嫁之子光遠興化軍司錄事光曾通判廣州

練幹譽字克家建安人崇寧二年進士調邵武縣尉遷福州戶曹安撫使黃裳嘉其材事無鉅細悉咨之薦爲開封府考城令時督辦軍賦甚急而民乃匱竭幹譽力爲請命中官有私囑者必置法除知濠州初與王黼有庠序之舊及黼當國未嘗一造其門遂奉祠靖康初嚴州寇亂經制使翁

彥國檄幹譽討捕幹譽將士備禦城賴以全

周因字與道浦城人紹聖四年進士授閩縣主簿調開封府尉氏丞入爲
敕令所刪定官出通判鞏州時朝廷建明堂天章閣鳩材於鞏童貫營私
第欲先得之因不可貫諷監司移因通判洮州因以事聞朝廷直之命還
任改判憲州叅遷京西轉運副使奏罷歲調廣武雄武折納梢草價錢請
儲本色以備河急宣和中汴流壅塞朝廷欲決潔口伊洛二水以入汴因
奏洛民恃二水爲生決之不能益汴什分之一請於河陰決黃流入汴民
亦不失二水之利改提點刑獄入爲戶部郎轉太府司農二寺少卿出爲
荆湖南路轉運使陞辭徽宗語及溪峒事對曰有邊事邊臣之福無邊事
朝廷之福時初得燕薊故因藉是以諷徽宗爲之改容建炎初高宗駐揚
州除直徽猷閣知靜江府安南入貢因慮啓戎心奏乞受其方物厚禮遣
還從之瓊州民陳韜乘朝廷多事聚眾焚澄邁臨高二縣提刑司議招降
因力阻不聽後果再叛因討平之時中原失守所在盜賊紛起因帥桂林

五載嶺表帖然官至中大夫致仕

弟固字適可崇寧四年上舍釋褐調越州蕭山縣尉用禮部尙書黃裳薦改舒州教授調漳州教授移江東提舉司管勾文字有旨令兩制各舉所知二人尙書曾孝廣以固應詔除太學學正遷博士拜監察御史改辟雍司業累章乞外以直祕閣知沂州未赴卒因子椿年孫嗣武嗣恭

椿年字春卿以蔭補將仕郎調明州象山主簿縣瀕海多盜偵伺賈船舶殺人取貨椿年籍其名犯者皆置於辟遷撫州判官江西和買例半常賦椿年疏其害於部使者使者檄差次裁損之仍下其法於一路秩滿知仙遊縣紹興末通判道州時令大臣各舉可爲郡守者禮部侍郎金安節以椿年吏績聞未赴而卒

嗣武字功甫椿年子以祖蔭補官授衢州江山主簿歷吉州永新丞歲饑奸民嘯聚發巨室廩聲言欲攻縣百姓惶懼嗣武曰吾在此爾毋動給榜勸富民出賑散其黨姦民屏迹擢臨川令郡督賦急嗣武每寬其罰守責

之曰賦入不登而屑屑理訟豈曰能吏嗣武曰朝廷設官置吏所以爲民若不辨曲直但峻催科下官亦不敢以爲能也尋以提刑使者薦赴闕奏利民三事擢主管官告院遷太府寺丞提舉江西常平事江西民輸役錢官司規利變省陌爲足陌嗣武奏復其舊遷湖北提刑蠻獠爲亂嗣武以渠陽去賊巢甚邇奏令荆南合兵督捕戮蠻酋七人而撫其餘黨以功進直敷文閣遷度支郎被旨使蜀稽考財計奏乞停成都潼川兩路科買一年以寬民力又奏蠲興元茶息錢引二十萬又言蜀號天險舍劍門無他路近歲文州開青塘嶺利州開馬道院皆不由劍門別架棧道以引商販宜悉撤之赴闕入對除太府少卿出爲湖廣總領滿一歲當遷嗣武不欲自言以故在楚最久歷四載始召爲戶部侍郎以疾卒

嗣恭字作肅父松年以因蔭授登仕郎歷寶慶府邵陽縣剋剔積蠹庭無滯獄部使者上其績改幹辦諸司糧科院遷籍田令奏對論民間疾苦皆朝廷所未及知者出知荆門軍遷知泰州致仕歸卒年六十有六

郭汝賢字宋卿浦城人元符三年進士居母喪以孝聞服除授連江縣尉調南安擢知福清縣嚴正不阿吏民信而愛之宣和初通判興化軍權軍事詳見丁父憂服除知沙縣擢知瓊州黎蠻叛殺掠居民汝賢遣兵據要地絕其往來前後掩獲數百降其酋豪海上寧謐以功增秩主管台州崇道觀卒年八十有二官至朝請大夫

黃洧字清臣甌寧人父銳登崇寧五年進士歷提點江淮荆浙福建廣南坑冶公事洧以父蔭補官調筠州高要縣尉時江西羣盜充斥王師討捕相繼洧率射士爲大軍前行數相與賊遇事平例受賞不自言功轉興化軍司理移監紹興府錢清鹽場改知侯官縣治以寬簡先教後刑母江氏故家福州族黨眾盛無一人敢以私干者未幾簽書平海軍節度判官秩滿造朝給事中黃祖舜薦洧材堪治劇清可律貧欲留諸朝辭母老求通判福州以歸未上而母卒喪畢用殿中侍御史陳俊卿薦除知南雄州郡小用度不饒舊常法外重贖以取資繼而榷酒酤增稅冊民益

告病沍至一切罷之改廣南東路提舉市舶尋遷轉運判官廣學租禮名士諄諄以崇儒重道爲先務番禺令近在帥司治所肆意爲姦沍數戒勵不能改乃捕其吏屬治之獄具奏上閱實抵罪以去一路肅然丁籍久失開收口賦之逋均及鄰伍沍選吏分行覈實凡所蠲十有五萬口江浙歲饑有旨發二廣義倉米航海詣永嘉往時嘗有此役吏並緣以擾民而米不時達沍區畫有方不越月而永嘉者八萬斛移任荆湖南路首論諸州以租米饋荆鄂襄陽諸軍地里之遠近不同則運載之費出於民者宜有多寡今諸州悉以遠道爲準而取其費民力重困請宜詔總領所前期下諸州隨其遠近以收運費從之異時郡縣預借民田租稅及他非法取民如甲札戶帖乳香茶引之屬沍皆禁絕勿行勸民廣濬陂塘貸以金穀事聞詔頒諸道以爲法尋被旨按行諸郡入道州界聞榔桂饑民相聚剽劫沍卽日還車披山通道問賊所巢乘夜突入羣盜不意沍遠來相顧駭愕一夕潰去沍慰安餘眾檄州運米賑給遂以無事榔桂民繪像生祠之

還任未幾卒時乾道元年五月也年六十有九洧內剛外和接物謙卑人有片善稱不容口至論天下事有不可意則未嘗有所假借云

王公濟字經國晉江人年十八登元祐六年進士宣和間知温州瑞安縣時方臘攻浙東諸邑直趨縣境公濟召邑豪及父老諭之揀丁壯得五千人朝夕肄練分守要害與尉梁範躬環甲冑九十餘日不入廨舍民樂爲之死賊至令將夏祥輔裒等迎擊之賊遁去後賊悉眾以來公濟張大旗陣中曰福建路槍杖手槍杖手者福建最義勇兵也賊望見以爲閩援至大驚卽引退賊平代還以疾卒有司上其功官其子瑞安人市哭累日立廟祀之

蘇伯材字廷構晉江人紹聖四年進士知潮陽縣有富民殺其姪女吏爲密懷金數百兩求毋入狀伯材立械之籍金於官事連縣佐眾請寬伯材曰國法也悉按治部使者以聞特詔褒異擢知韶州時提刑司吏橫甚嘗誣翁源縣民爲盜以倖賞因賂縣官梁格就獄殺之伯材廉其事奏於朝

格坐黥配海島吏伏辜

傅維肖字應求南安人紹聖四年進士知臨江軍清江縣歲歉發倉賑濟
饑民赴糶爭攘之巡尉希賞欲以強盜論維肖曰迹則似矣顧未嘗結徒
操兵奈何加以重辟由是全活者眾終岳州通判閩書作徽州與泉州府志異子倘以
蔭補潮州錄事參軍請蠲上供耗銀民德之歷知肇慶府端溪有紫石可
爲硯屬縣以石工占胥無慮數十倘悉斥去之

王炳字景文南安人紹聖四年進士初炳娶呂惠卿同產女未嘗于謁後
爲海州沭陽令有聲秩滿入都時蔡京當國登其門者悉通貴炳不往左
授泰州海陵丞以歸及京敗炳獨得全通判潮州改知汀州提舉洞霄宮
子侃字仲和以父任入官歷肇慶府司法通判王衣俘商人數百名指爲
盜分圖鍛之侃持不可衣適攝州守督獄愈急同僚以危言怵之侃曰吾
守職耳他非所憂也已而移獄廣州安撫使親鞫得實破械釋之尋知漳
浦縣擢通判福州未拜命而卒侃子顯世蔭補興化軍錄事終知贛

元
州零都縣

張讀字聖行安溪人紹聖四年進士歷福州教授調潁昌府法曹參軍范純禮爲守深器重之召充編修國朝會要以父年踰九十求便養通判全州後除諸王府直講請郡自效出知興化軍建炎二年詔命近臣各舉所知中書舍人黃唐傅以讀名上召赴行在引疾固辭

案唐傅嘗受張邦昌僞命讀之

不出殆恥出於唐傅所舉與

家居杜門卻埽里人矜式焉性至孝居喪廬墓蔬食終制

所交皆天下士與陳瓘尤友善遇事深沈有遠識不以意氣凌人蘇轍嘗爲其兄軾作墓志密以示讀讀曰斯文妙盡東坡平生政恐仇人復藉此媒孽不若刮磨之爲愈使東坡無此銘萬世之下其不蜚聲騰實乎轍深然之晚徙居晉江日與李邴過從論文家無羸餘有所入卽以分親故之貧者卒年八十

廖天覺字仲先順昌人紹聖四年進士知越州餘姚縣屬行方田法天覺簡其事曰民使之兼監石堰鹽場歲課增羨例轉三官不受移古田縣令

張穆爲閩部使者稱其可比古循良後以朝請大夫致仕

吳思字子正邵武人元豐二年進士調蘄州黃梅縣尉再調虔州右司理參軍虔俗獷悍喜訟鬪視他郡爲難治思敏達強濟事至輒迎刃解會昌民有誣告毒斃者縣獄具思直其寃得不死令恨復訟思不已守遣思更訊卒如思所斷法當遷秩任事者不以聞思曰吾爲理官治獄求生蘄盡吾職而已無他覬也就移和州防禦推官除知吉州吉水縣有老吏無法爲蠹思廉得實繫治之欲汙思以緩其獄闕思出謬爲家問置金其中使小吏納之思妻黃氏得書覺重疑之卻不受思適自外至發書得金詰得其情吏遂伏辜富路以爲能交薦之改宣義郎知池州建德縣興學校勸農桑教民力本歲餘矣治徽宗登極覃恩遷奉議郎賜緋衣銀魚辟福建路轉運司管勾文字明年丁母憂服除監江州廣臨監值更錢法日夜鳩工赴期會以課最聞再遷承議郎還闕除監大觀庫大觀元年以疾卒年五十有三思爲人樂易不事表襮家素貧清約自克而調恤族黨無吝色明

達吏治所至有聲士論每以用不極其材爲憾而思處莞庫恬然也子偉明字元昭崇寧五年進士歷秀州崇德縣尉紹興中知興化軍政尙簡嚴吏民安之後奉祠歸

余祖奭字景召莆田人初名祖禹改今名未冠入太學與同舍生胡安國宗澤相親善學官鄭移范祖禹皆器愛之元符三年登進士第歷秀福青三州教授轉通判建州未上會鄉人林孝淵得邠州倖祖奭慨然曰孝淵母老矣遠宦非心所安吾獨不能效古人以柳易播乎請於朝願代孝淵任孝淵由是得改建州祖奭至邠復移蘭州會地大震山崩城郭廬舍盡陷祖奭若有神護置之隙地於是拯傷扶殘瘞死賑饑恩卹備至蘭人德之代還主管福建轉運司文字時建卒葉濃作亂祖奭挺身諭以逆順濃遂退以功轉朝散大夫知南恩州海寇卓全高領徒千人沿海剽掠祖奭內嚴控扼外示閒暇賊不敢犯部使者以聞召對指陳時弊忤秦檜意引疾丐祠歸後九年賜品服又二年轉朝議大夫封文安縣開國男卒年八

十有四祖奭性至孝母喪廬墓父喪過時猶毀瘠甘露降於塋林者兩月
城東有白湖港祖奭捐貲倡鄉人伐石爲梁醮爲十道行者便之子武弼
武揚

武弼字直儒以蔭補萬安軍陵水縣尉紹興五年試明法科第一特授廣
東提點刑獄檢法官遇死獄屢有平反移福建檢法司時汀州盜嘯聚成
禽武弼籌策力居多轉承議郎知南安縣民甚戴之以父老力丐歸養武
弼三歲喪母事繼母尤謹及祖奭卒哀毀羸薨未及期卒

武揚以父蔭任福州司理與郡守王之望爭假印獄謂囚實窮席爲之非
造也罪當減守不聽遂納官歸子秀實厯知衡州終朝請大夫秀實子師
魯厯佐廣州東莞南海二縣尉知韶州乳源縣移知潮州潮陽縣通判瑞
州蘄州建寧府添差浙東安撫司參議官

黃琮字子方莆田人元符三年進士厯長溪福清二縣尉知閩清同安二
縣攝侯官縣移知縣內臣楊安時爲廉訪使數干以私琮拒不

納安時還朝對人言及琮輒切齒一日奏事徽宗問闔有賢令否安時錯愕出不意惟憶琮姓名因舉以對徽宗喜召赴都堂賜章服除員外郎通判漳州時鄉人方翼爲守琮與之可否相濟卒成美政金人入寇詔琮統督建劔士兵以備攻守賜五品服改朝奉郎建炎初更鹽法移監福州嶺口倉兼長樂縣稅以母老丐祠未幾致仕時年五十有二給事傅崧卿薦於朝言政宣閒邑令以治行稱著黃琮陳麟翁谷閩部稱三循吏而琮爲之冠乞落致仕特起用之不報已而母卒琮居喪哀瘠不食甘露降於總緯郡縣訪其事琮曰豈敢以冥漠欺人要君耶歷官三十年退休無一夫之田五畝之宅處之泰然年八十卒於家

林迪字吉夫興化人少讀書於邑之香山與陳易爲忘年交以太學上舍優等擢紹聖元年進士授福州左司理歷南劔州教授改所合入官復教授汀建二州秩滿差知龍溪縣平易近民有古循吏風縣民詣臺府願留因任九年時相蔡京林出也欲藉是交納於迪迪以非同族拒之歸

自龍溪三請祠祿建炎中詔舉遺才帥司以迪名進辭不赴卒年七十有六迪操履端方素爲鄉人所推重鄭樵嘗言吉夫耆老碩德在崇觀閒仕不躡進所至以治效稱居家累年不以私事請託有司門寒官冷晏如也陳師立字可權興化人少爲福清鄭俠所器長遊京師師事贛州李朴第崇寧五年進士歷知連江縣有妖僧自言前知人爭趨之師立曰我爲邑長奈何縱左道以惑衆耶僧聞之亟遁去移知順昌縣用薦者改知信州上饒縣建炎中召知官告院未幾請老五子皆仕昭度見儒林傳

邱允字執中長溪人父腴少孤傭書養母撫育弟妹鄉鄰有爭者率取平焉允登元符三年進士授真定府欒城縣尉適采砲石軍暴橫允申明禁戢之調知岳州臨湘縣甫三日平反冤獄五十餘人郡守鞏璘喜曰令皆如此天下何憂不治改襄州鄧城縣除官府買絹之害移洪州新建縣時道流恣橫凌民允嚴繩之道流訴於朝宰相蔡京欲加允罪徽宗曰吏以愛民被罪何以勸天下遂釋之擢知柳州京新行茶法豪右恃勢欺詐官

吏不敢詰允窮治其奸復疏陳廣西鹽課之弊朝廷下其法於兩廣民以爲便建炎中召對首請上稽天意內勤政事任賢遠奸無或豫怠高宗嘉納除知惠州致仕卒

張大年浦城人政和五年進士補臨朐尉改鍾離丞遷知袁州萍鄉縣時金人深入江浙羣盜蠭起萍鄉爲江湖要會大年日閱民伍教以兵法聲聞四境盜不敢入直徽猷閣周因帥廣西辟爲經略司幹官會管道蠻獠作亂僭號所在深險官兵不能捕大年分據要害議持久以困之賊衆饑果潰海寇陳韜等出沒爲二廣患帥司奏大年通判瓊州專掌討捕賊聞大年威略遂率衆降加秩二等通判道州陞知韶州卒子次夔次高

次夔字和仲蔭補福州司理部使者攝州事以私意撓獄次夔持不可使者不能奪丞相陳俊卿判福州薦知衢州西安縣改通判興國軍郡多私鑄守委幕官捕治擾及平民次夔力爭其非守不聽已而羣起爲盜嘯聚湖島諸司廉得其實守及幕官皆坐罷次夔以此知名後奉祠里居值歲

小歙邑西鄉山寇張海倡亂次夔請邑宰率弓手捕之宰懼怯不前乃乘
馳報府檄次夔糾集鄉兵禦之斬獲數人賊宵遁鄉人立碑紀其績

次高字寬夫蔭授廣州東莞縣尉調長溪縣尉以獲賊功除知南康軍建
昌縣督造軍器前期辦集進秩一等通判南雄州被薦內遷以母老丐近
移知南劍州陞辭論州縣科罰苦民事孝宗曰犯罪有條豈應以是生財
卿當爲朕勤恤民隱簿書獄訟姑次之既到官治績爲諸郡最改知徽州
母喪服除知邕州奏乞減放廣東路丁米孝宗俞其請徵外蠻蛋接境交
爭次高視事甫三日單騎渡江慰撫之皆帖服獻其所畜良馬在任數年
夷俗相安厯講馬政馬歲溢額以疾丐祠命未下而卒官至朝奉大夫

鄭彊字南美侯官人崇寧五年進士任萍鄉合邑多瞽民彊謂縣形勢如
飛鳳鑿雙池縣南以象兩目民遂少瞽虞溪水漲築隄障之號鄭公陂遷
知汀州有宦績郡人立祠祀焉

黃烈字元功浦城人宣和中知處州時方臘作亂麗水松陽遂昌青田皆

陷而龍泉獨完烈奉詔卽龍泉治事區畫得宜賊將洪載遂以州降烈與越州通判石端中重修郡城民賴以固

翁彥約字行簡崇安人兩舉於鄉皆首選徽宗卽位下詔求言彥約上格言二十篇上篇自禘命原化典學崇儉以至審治言所以立德下篇自擇術因任兼聽務和以至審勢言所以立政時論躋之初彥約以父蔭讓弟彥深彥深更推與季弟彥國旣而皆不受赴禮部試彥深彥國相繼登進士而彥約叅舉不第益自奮政和二年始第進士叅遷太常博士歲餘乞補外除提舉河北西路學事陞辭言朝廷舉八行復試以文與立法初意異請凡八等無間高下俱與廷對以示詳行略文之意時浙寇犯衢處二州彥國適知建州彥約以書屬之曰賊方熾勢必侵軼吾郡自衢信抵浦城崇安險阨易守不可犯惟處之龍泉至松溪浦城皆蕩野無捍蔽龍泉破則建危矣龍泉之士有葉植者其人邁往有智略因之使拒守宜可倚辦彥國深然之比至鎮已率眾拒賊卽出兵益給糧械助之卒如所料提

學舊不與民事彥約所至訪求民間利病及實邊制勝之策將以歸報日
面陳之會罷使事不復召對權發遣黃州宣和四年夏之官道改高郵軍
郡當江淮孔道商旅多以貿易茶鹽爲業姦民與吏役通輒藉私販告訐
雖圭撮銖兩亦連逮彥約甫下車盡斷無留吏猶欲以枝辭蔓其獄彥約
曰茶鹽兩訟充斥若等尙患其少耶吏聘貽失對自是不敢倚法爲奸值
病上章乞致仕未報而卒年六十有二彥約性和厚慮事精審沙縣陳瓊
晚居淮南見而喜之語人曰翁奉常靜恪有謀使得志殆能濟務也子挺
字仕特用季父彥國恩補官調郴州宜章尉改侯官主簿遷濠州鍾離令
歲旱請粟十萬斛以貸饑民建炎元年改將作監丞明年言者追論彥國
并及挺除名鄰州編管赦歸遂不出

章元振字時舉崇安人政和五年進士歷潭州寧鄉令帥臣曾孝序廉其
能調長沙改知徽州休寧縣丁方臘之亂元振極力撫綏屬嚴州寇繼發
督兵捍禦縣賴以安移知泰寧縣後知潮州悉革蠹弊民爲謠曰長

言法到葵關住今出葵關到海陽久之改知肇慶府以治行聞遷諫議大夫提舉廣南東路常平茶事兼東西路鹽事自秦檜當國除吏多親故元振與檜同登第甘於遠宦未嘗以私書干檜銜之前知潮州時監司爲元振壯上檜但籍記中書而已至是稍錄之元振卒不與通子才邵字希古以父蔭補官少時謁楊時時教以熟讀論語自是以躬行自勵乾道中厯知賀州移辰州上言辰之諸蠻與羈縻保靖南渭永順三州接壤其蠻酋歲貢溪布利於回賜頗覺馴伏盧溪諸蠻因靖康多故縣無守禦犴狴乘隙焚劫後徙縣治於沅陵縣之江口蠻酋田仕羅龔志能等遂雄據其地復有沅陵浦口一帶地方平行膏腴頃爲猺蠻侵掠民皆轉徙田野荒穢會守卒無遠慮乃以其田給靖州犴狴楊姓者俾佃作而課其租所獲甚微楊氏專其地將二十年其地當沅靖二州水陸之衝一有蠻隙爲害不細臣謂宜預爲之備靖康前辰州每歲蒙朝廷賜錢七萬貫紬絹布共八千一百匹綿一萬七千兩是時本州廂禁軍一千四百餘人沿邊一十六

砦土兵六百餘人皆可贍給其後中外多故歲賜止得一萬二千緡而本州財復匱乏無以充召募之費禁軍止二百一十餘人諸砦土兵止一百五人甚至砦官全無一兵而徒存虛名者其於邊防豈可不慮若歲增給民錢一萬俾本州募強壯禁軍或効用二百人分屯防扼庶使邊患永消可免異時調遣之費詔湖北帥臣詳議以聞尋充湖北安撫司參議官

吳達字公路崇安人宣和三年進士調永福縣尉以獲海寇功改秩知泰寧縣縣舊有敷茶引錢過重達力請上司爲蠲其半改知順昌時閩盜蝟起達常以身捍賊威聲四馳移知將樂縣擢通判南劍州除知肇慶府學田久爲豪民所吞達至置籍鉤考一畝不遺遷知濠州奏乞懇關民田以廣兵儲調廬州兼准西安撫司事尋提點福建刑獄會轉運司配食鹽害民詔下提刑司核實立定綱數以去科買之弊達條奏規畫民力稍寬而官以爲不利衆論譁然上章交爭已而更議卒不易達言遷直祕閣

知鼎州

江灝字良弼崇安人宣和六年進士調筠州上高縣尉靖康間盜起灝率兵擒其渠高宗南渡領所部勤王張浚深獎重之遷劔浦縣丞未赴范熊二寇竊發建劔騷動部使者聞灝上高政績委督巡尉統義兵捕之尋爲常州無錫令邑當孔道困於師旅供饋灝不忍重斂移兌常平以佐其用劉子羽宣撫江淮辟掌戎務紹興中知南康軍厯知郴象二州民繪像祀之後有以廉吏薦者高宗識其姓名於屏特賜紫金魚袋進朝奉大夫孫默點曾孫墳皆能世其德 默字德功從朱子遊乾道五年登第厯安溪光澤縣尉有聲後知建寧縣卒於官民思之不忘 點字德輿以特恩補官調郢州錄事郎常平庫失銀數甚夥方捕緝閒賈人劉福因貿易得銀一笏上有田家抵當四字被銀匠首發福不能直官籍其家約萬餘緡法當死點言於守以爲枉乃緩其獄未幾經總軍資二庫皆被盜失會以萬計時有小使臣李義者供館一妓用度甚侈點疑之密囑人襲妓家得會一束白府搜義行篋凡千餘貫皆三庫物也福冤始伸人皆服點之明仕終

漢陽軍簽判 塤字叔文嘉定元年進士歷知靖州永平縣尋通判靖州以廉白清簡聞魏了翁謫其地塤築鶴山書院居之嘗條五事上於朝皆熟察民隱可爲永利者帥臣奏其治績改知開州未拜命而卒始默從朱子講學至塤又受業於真德秀皆以儒術爲吏治人謂其淵源有自云塤子燧鎔別見福清宦績

葉廷珪字嗣忠甌寧人政和五年進士除武邑丞時方興燕山之役廷珪資餉饋運不失轉知德興縣張邦昌僞詔至不拜後差知福清縣民困鬻鹽廷珪請增鹽錢又採煮鹽利害作圖及書州縣遵用之遷兵部郎中奉祠歸

魏懋字覺民甌寧人宣和三年進士建炎初調虔州雩都令時江西盜起虔諸邑多失守懋出私帑犒勵弓級固守有巨寇謝樵者來攻邑治繫日不能克遁去岳飛行兵過境見井邑無殘毀甚稱賞之及范汝爲寇鄉縣有發懋先墓者懋號慟棄官歸比至寇已平懋緝得二兇梟之墓右上狀

白劾郡將義之釋不問後知洪州南昌縣卒孫復中南劔州法曹

陳康年字季昌晉江人政和二年進士歷知潮州海陽潮陽二縣捐俸以貸逋賦運私穀賑饑民尋通判潮州攝州事黎寇犯境嚴備卻之歷官二紀公廉如一日潮人以與陳堯佐先後爲通判並稱二陳

吳達老字信遇惠安人初名天經改今名登政和五年進士調南康軍建昌縣丞會詔更釐法達老白於令曰釐商重困矣堅執不行曰雖重得罪無害申郡乞奏未上朝廷聞其不便罷之後知惠州大興學校令簽判陳鶴掌教事執經者數百人有承節郎謝革者遣兇徒劫仇家刃殺其主焚所居室獄具達老慮賊黨奪囚先處決之然後自劾待罪有子七人兩遇郊恩皆以與弟迪老速老曰一官不足爲吾弟榮聊以慰母心爾母年八十餘三乞奉祠侍養起知潮州卒於官

蕭韡字棠仲龍溪人大觀三年進士歷古田縣尉福清縣丞遷知南恩州道遇蒺藜賊蒺藜賊者言其劇害可畏也咸頓首曰聞公德政願乞

更生韡下車首招徠之盜患遂息郡無城郭民苦海寇不時至韡爲築城植刺竹海寇亦不敢犯舊未有學秀民一切編丁身役韡建學舍市田置書聚生徒教養之任滿乞祠里居二十六年卒壽八十有九

鄧根字深伯邵武人重和元年進士建炎初知秀州崇德縣有風力杭州軍校陳通作亂根同經制司屬官鮑貽遜率槍杖手與戰已而御營統制辛道宗軍次秀州而潰道宗奔還鎮江亂兵擁高勝爲首攻秀州遂迫崇德根善射有勇略力卻之明年盜徐明犯境根復討平之吏部侍郎劉珪薦於朝轉通直郎會金帥宗弼兵至守臣程俱遁去宣撫使周望之用州民所請命根攝知州紹興末除直祕閣爲淮東安撫使兼知揚州尋與祠歸

黃宣莆田人政和二年進士歷辟雍博士出知蔡州遂平縣時李彥以承宣使按京東西公田縣有奸民王時者窺彥意乞籍遂平租以供延福內藏彥三奉御札檢按宣屢執奏不行有旨遣中使周詢到縣覈實宣復以

身捍之由是蔡州十邑惟遂平得免括公田後召爲太學博士卒靖康初
彥伏誅梅執禮孫傳等奏附彥之人朝廷旣以次貶黜如宣宜加褒異詔
與一子官

陳鶴字聞野莆田人宣和六年進士調潮州海陽縣尉改奉議郎轉建安
縣丞遷惠州判官惠俗僻陋郡守吳達老大興學校命鶴典教事執經者
歲數百人鶴乃捐判官廳所得鹽倉蘿頭利市錢增置學田厥後惠州人
文之盛實自鶴倡之尋除朝奉郎通判廣州值海寇猖獗安撫使委鶴督
捕鶴斂兵示以無事俄而掩襲擒三百餘人兵官欲悉誅戮鶴請原其脅
從者踰年卒於官

歐陽直卿字溫叟莆田人父盼政和二年進士歷敕令所刪定官直卿以
父蔭授右迪功郎調劔浦主簿張浚出鎮福州檄決長樂縣滯囚薦爲惠
州推官直卿白於郡守以河源多菽麥令輸送而海豐瘠土宜聽入直自
是歲以爲常民甚德之清漳以南山谷多剽鹵守將尸居龍川遇有警不

卽援直卿數走龍川面責守將復厯阻隘勵兵校自是多感奮擊賊遷知潮州海陽縣丁母憂服除改知漳浦縣所至稱治遷惠州判官轉宣議郎通判台州卒於官年六十

洪處厚仙遊人父範大觀三年進士知清溪縣處厚以父蔭調鬱林州推官時欽州守倖互相抵訾置獄禁勦連年不決逮證一百七十餘人處厚審讞明允悉得其情盡釋之

陳可大字齊賢仙遊人政和二年進士除熙州司戶改潮州教授再調漳州工曹兼右推龍巖解上死罪強盜七人可大明其非辜得不死時稱神明建炎初遷知長樂縣久之擢知肇慶府郡多蓄蠱毒設法除之端溪出石硯常貢外多加取以媚權貴民受其害可大以舊鎮庫石裁制如式應貢民得聊生繪像祀之旋以歸養囊無餘貲惟書籍而已積官至朝散大夫累贈中大夫子伯玉仲珪皆以父蔭補官伯玉承議郎通判邕州仲珪朝奉郎通判漳州

傅佇字凝遠

案諸志皆以佇為楫諸孫攷渭南文集佇墓志云公之大父程父嵩以累舉進士開門教子不肯仕累贈奉直大夫公奉

直第二子云云則佇非楫諸孫也

仙遊人重和元年以上舍登第調滄州無棣縣主簿金

兵南下兩河皆震郡檄佇餉軍佇得檄即行飛輓無乏絕金兵退佇遭父

喪歸服除得順昌縣尉徙南安縣丞擢知晉江縣除其木事司幹辦公

事遷通判南劍州未上卒年六十有八積寄祿官至朝奉大夫佇當官三

十九年先疇無一壟之增老猶力學不厭行其所知未嘗以窮達累心所

居傍有路達泉州而林谷阻險者四十餘里行旅告病佇率親黨塹山伐

石易為夷途人至今誦焉疾革戒諸子曰吾平生無愧頰仰歿後汝曹居

官主清居家主嚴奉先主敬收族主恩造次顛沛必主忠信能用吾言雖

貧賤猶為有德君子不然躡取光顯奚為哉語終遂瞑子浹汶淇浹奉議

郎知漳浦縣莅官有家法汶淇各有傳

黃徹字常明興化人祖中庸皇祐五年登第歷官太常博士浙西提刑徹

擢宣和六年進士歷辰州軍事判官攝通判事郡將汪長源與搖首有隙

西鼓衆數萬言渡江乘城入。河懼徹單騎入。猶巢穴開諭禍福。悉愧懾謝罪州。賴以安繼權沅州麻陽縣。巨寇曹成逼境。徹率羣獠禦敵。擒其首領數人。賊宵遁。辟鄂州嘉魚縣令。下車未幾。流移還集。復權知岳州平江縣。帥司交辟爲幕官。平江士民千餘人詣都督行府乞還任。右僕射張浚上其事。有詔卽真湖賊楊么抄掠數郡。遏絕水道。官庫屯岳陽。而縣距州數舍。地險艱於轉餉。徹慮糧食不繼。預設巨艦。令民輸租。其中得米千餘斛。乘風而前。賊引數十艘尾逐。會官軍至。隻舟不得返。因降其衆。官軍得以仰哺。賊壘遂平。秩且滿。有權貴寄產於縣境。爲民患。徹案以法。權貴陰排之。徹自以不善諧俗。遂委官而歸。已而浚爲福建安撫使。招致幕下。數月。徹不肯畱浚。謂人曰。如黃令之才。使稍宦達。何所不至。今恬於名位。甘老林泉。平生抱負弗克施。良可惜也。子廓有孝行。芝產於廬者三。同邑鄭樵爲文紀其事。孫燾。淳熙十四年進士。任武岡軍教授。遷知仙遊縣。

鄭穆字應和。長汀人。父立中。見忠節傳。穆以父功。謬揚州泰興令。浚河漑。

田二十頃再調濠州定遠令臬逋寇葬枯骸尋攝平江府常熟縣事潰兵
 絕江繇福山闖關穆單車撫諭事遂定有久訟得直者袖白金數金為謝
 穆正色卻之終朝散郎徽州通判

福建循吏傳卷二

宋二

江安止字元靜建安人建炎閒知麗水縣爲政明敏案無積牘盜發鄰郡預爲備皆遁去秩滿民詣闕請留六年去後以其餽贖不受者造摩劍支天象於廣福院以報善政

翁積字德功崇安人博學負氣尤善談兵初以鄉貢進士試禮部不第遂棄舉子業建炎初閩中盜賊蜂起績與鄉人王佐才集義旅保障鄉閭紹興五年以誅賊功補下州文學調惠州推官屬邑多寇盜績率郡兵勦之獲賊首黃白旗等三百餘人已而至潮陽劇賊謝花九等聞風遁去歷黃州推官桂陽軍臨武令所至皆修武備蠻獠懾伏後以秩滿乞致仕官終承事郎孫華登淳熙二年進士知茶陵軍臨武縣

王純字長紘閩縣人紹興中知崇安縣摘發奸伏吏憚其明他日數一吏罪過吏懼賂庖人置毒炊餅中食未畢亟入廁仆地卒後二日神附婢體

踞榻坐請丞簿尉至斥吏杖數之曰諸君皆在好啓吾棺吏與庖人皆伏辜邑人哀祀之

葉縮閩縣人紹興十七年知處州龍泉縣令行禁止訟牒至庭燭見情僞委曲開諭曉之以理抵罪者咸自輸服習俗好爭教以懲忿息怒全身養生卒多感化先是邑佐括民老病者以爲隱丁抑之輸納縮驗而免之蒲堯仁字彥性福清人紹興十八年進士乾道六年知吉州泰和廉白端謹自奉尤薄閒輟俸散之貧民不爲儲積計縣宇火邑人出力新之不費堯仁一錢居官三年去之日邑人齎錢帛送之一無所受龍圖學士胡鍾薦之曰所居民化所守不遷

林珣字德潤長溪人紹興初詔求直言珣上砭石論四十七篇補右迪功郎權滁州軍事判官六年用薦得召對珣進三劄高宗面諭曰前見砭石論今復見此知卿忠義不減唐馬周也改右承務郎歷知宣州宣城縣縣有筮岳豐稔兩陂遏溪水以溉田自政和初爲水所壞歲常苦旱莫能復

者珣修治期月而畢明年宣城大水破壞一百六十餘所而珣以
姓更名曰林公泉改知常州無錫縣舊例令佐四廳督催賦稅游民得以
爲奸號雜催者至七百餘人間問患之珣盡革其弊終年未嘗追戶長一
人到官獄訟衰息各安生業酒壚茶肆至無村民之跡縣以大治最聞移
通判邵武軍有宦績尋爲言者所誣罷去久之朝廷知其冤起通判福州
三十年吏部侍郎洪遵奏珣敏於爲政治民有愛利之惠行已有公廉之
稱乞擢繁劇州郡守臣任使改知黃州明年移知江州三十二年珣引年
丐祠以代者曾惻被劾特留終任尋知太平州致仕

王宗已字子游長溪人紹興二十七年進士歷廣州增城令治績居最孝
宗特書其名御屏秩滿調知平江府常熟縣水軍統制馮某抑配民戶宗
已奏乞戒約有旨除監登聞鼓院尋知廣州移蘄州時待闕者十餘人孝
宗指其名示宰執曰是宰常熟者宜授之官

王亙字伯通侯官人旦第紹興三十年進士淳熙中知惠州博羅縣勤於

吏事修隨蘇村二隄百姓賴其利後與單倬相繼知南恩州力蘇民瘼民兩賢之

張本中長樂人紹興元年知連州陽山縣勞心撫字春秋循行阡陌教民稼穡察歲豐儉而施之以政民皆遵行之舊俗婚喪以歌唱爲禮本中下令嚴禁風爲一變

俞翊崇安人以父日新死事恩澤補官歷知紹興府上虞縣有廉名用宰相湯思退薦知饒州廷臣以翊資淺不當得大郡思退力言其能到郡理繁治劇政聲大著就除提點坑冶卒

林杆

閩書作杆

字廷植晉江人紹興十八年進士調惠州歸善縣尉獲鹽盜十

餘人白郡守寬其罪不希賞格轉肇慶教授安撫使林孝澤杆故人也持

節行部不入官舍而館於肇慶之學守貳以下謂帥親杆俱來通牒求薦

杆攜牘語孝澤曰公宜他徙毋重困我孝澤啓牘曰他且無論守汝上官

吾當薦之守聞持金詣杆謝杆驚曰何使君待我薄也守慙而退遷南恩

州簽判卒於官

黃濟字義卿晉江人紹興二十年自肇慶通判攝守新州踰年種刺竹圍城一千二百餘丈先是鄉民之貧死者猶附於籍富厚者多避役濟榜諭之且置大櫃於州門令民自投戶數於中限滿折封於是戶曰覈實賦役均平民以不擾侍郎胡銓爲文記之

柯宋英字子飛晉江人紹興十八年太學補試二萬餘人宋英名第一二十四年登進士第教授明州召除國子監學正遷本監主簿出知梅州州有程旼南齊時隱君子也程鄉縣所繇名矣宋英關齋曰景程任滿獄無死囚代還三奉祠祿杜門謝客州縣希識其面卒年八十有六

黃適字德夫晉江人少以詞賦名登紹興二十七年進士厯知廣州東莞縣不苛而辦府帥意縣有餘藏會適謁府遣掾攝其職掾窺帥意籍常賦爲贏以獻他日府責賦適報掾已輸矣府豈欲令再斂邪文移數十訖無以應而止帥因薦適治狀籍記中書秩滿擢知新州

曾崇字希元晉江人父恬見儒林傳崇以父蔭監潭州南獄廟調臨安府錢塘主簿南渡後錢塘爲赤縣小官吏率奔走不復能顧職凡輸送之籍不以時注民被追擾甚苦崇督吏注籍惟謹日夜稽攷至廢寢食府尹趙子瀟遇僚吏不假詞色惟待崇頗盡禮時俾攝其屬以自近就差衢州西安縣丞劉拱周操相繼爲守皆器之屢決疑獄於旁郡用薦改右宣教郎知湖州安吉縣民悍吏猾崇處以寬明鬪傷爲減獄罕重囚乃新學舍延俊秀勸以道藝民相率詣部刺史乞畱近臣亦薦崇可應監司郡守適從父懷參大政以爲嫌僅除通判臨安府朝廷新垂拱前殿建太學御書石經閣崇總工役皆以辦治受賞秩滿除權發遣高郵軍陸對言天下之弊莫大於無實願獎敦厚抑虛誕以變風俗又言兩淮州縣類多掊克資妄用徒知修城池闢田野爲邊備不知民和邊備之本也孝宗稱善崇至郡以鎮靜不擾爲先率斂橫取爲戒釋民之負官錢貧窶無所償者凡數千緡謹征權簡燕集罷工役用果有餘其爲政寬於治民而嚴於駛吏人服

其平莫敢犯淳熙七年卒於官年六十有六

范潔字景圭劍浦人南渡初知新昌縣披榛櫟撫瘡痍以創縣治紹興中守光化軍後守鄂州仕終漕使

楊汝南字彥侯龍溪人紹興十五年進士調贛州教授撫詩春秋中庸要旨著經說三十篇以授學者仍表進於朝祭酒楊椿覽之曰今之師範也以薦改秩知古田縣孫承祖字慶襲弱冠通百家工詩以祀澤補官初調邕州理曹再調循州推官於郡政多所裨贊改知安溪縣勞心撫字去日邑民遮道擁畱後通判循州父老迎謂曰是吾前日清嚴推官也攝守惠州提刑使者王彥首以廉吏薦除知新州帥洪伋辟守恩平復改守梅州赴闕奏事條上二廣利病年五十丐祠歸築別墅於保福隆壽兩山間扁以福壽林塘有荷十里扁曰歸耕與諸賢爲真率會幅巾蕭散恬如自樂羅烈字子剛長汀人建炎二年進士調同安縣尉叛將楊勅自劍趨泉烈部兵捍禦邑恃無恐紹興初改循州興寧令會羣盜出沒一日突入縣城

執烈去烈不為動徐以理論之賊不加害遂還邑無何賊復來烈率千餘人擣其巢大破之賊皆潰遁得所掠子女二百餘人遣還家移知吉州廬陵縣自慶曆中詔諸縣立學而縣庠介於官寺通衢之間狹隘殊甚烈至拓地經營規模始備官終宣教郎

賴紱字冕仲清流人紹興五年進士調梅州程鄉縣尉值盜起畫策招捕境內悉平遷鎮南軍節度推官改京秩南劍州某縣案閩書失其縣名轉運司增

敷民鹽紱知其抑配堅不奉命終簽書清遠軍節度判官紱居家嘗冒白刃救其叔父躬詣賊壘勸諭解散其眾鄉人重焉

吳廷秀父公誠官古田有宦績廷秀以父蔭補官歷通判循州紹興初改知德慶府劇盜李金閩書作李全誤掠湖南乘勝擣嶺外直抵晉江廷秀率吏民

募獠丁拒守賊薄城下勁弩齊發斃其三酋分騎追擊郡以無事事聞轉

兩官

方擴字端之艾軒集作端立晦庵集作端正今依閩書莆田人曾祖慎微贈吏部侍郎父希叔

累贈右朝散大夫擴登紹興二年進士第調南雄州保昌縣尉南雄州接
壤汀贛人多梗悍歲不熟卽去爲盜擴嘗一至賊壕募不遽入有來覘者
擴熟寐達旦乃發柵盜皆懼伏而散左司諫韓璜尙書郎林說先後持節
廣南交口譽擴不置循從政郎差補建安縣丞用薦者知閩縣移知温州
平陽縣轉承議郎賜五品服擴爲邑如治家舍竟日坐庭中聽訟鞭朴無
所用悉達其情郡守苛急夏稅輸絹率至萬錢擴以爲賦調倍蓰寧忤
上官不可苦百姓力爭之旣而侍郎張九成尙書王大寶相繼守温卒如
擴議時有部使者按縣以平陽政有善狀同九成大寶白於朝得旨增秩
通判臨安府累遷朝奉大夫求外補出知岳州州爲沿江表裏重地擴條
上利害十三事大略以內治爲急而後攻守可以次第施行識者韙其言
孝宗登極恩轉朝散大夫乾道元年主管台州崇道觀明年卒年六十擴
通今嗜古同郡鄭耕老林光朝龔茂良劉夙兄弟皆敬重之積官至二千
石自奉如布衣惟以周貧恤舊爲務有友人赴調貸之錢三十萬未至而

其人歿擴卽以此錢贖其喪其篤於行誼多類此子伯達贛州信豐縣主簿仲忽撫州司戶

陳士宏字毅夫莆田人幼耽書不好狎與同邑林光朝以實學相勵登紹興十二年進士調監惠州泊頭場鹽稅先是歸善寇作剽剋出沒流人未復其後少休息而州縣責以頻歲之逋民逃散無敢歸耕者士宏攝邑事自於部使者請較數歲去其十之七於是轉徙者復業朝廷頒下經界議博羅一邑數月無定畫適士宏解官由博羅父老聞士宏名遮道乞畱士宏辭不得去居三月爲之開諭法意事乃定用舉者關陞補潮州揭陽令南土有通俠者停留海上椎牛販鹽如豪賈而實以剽鹵爲事士宏至按得其狀卒伏誅自是舟行無恐兩稅所出爲文書檢約分置鄉井令相轉遞民不見吏胥追呼之擾囚繫未遣遇歲時必脫械稍出之聽訟如待家人予奪不出一二語學館舊不振課試指畫無閒寒暑士風一變監司郡守以異政條上當換秩士宏少請便地補惠安縣丞未幾卒士宏之在泊

頭也永嘉陳鵬飛謫知惠州士宏一見如舊令第士器師事之鵬飛以書抵光朝曰毅夫吾之友吾得毅夫不至有索居之歎矣鵬飛卒士宏爲之敦匠假寔時一往哭之如新喪尋得旨歸葬士宏護送數百里惠人義之士宏自見鵬飛後學益進而有得夫養氣守約之說作魯論章句未終篇大率謂古人有是言約之吾身爲然則古人爲然也光朝每稱爲端人云方士端字德明莆田人以授室宗邸補登仕郎紹興中轉迪功郎調同安主簿攝尉得盜當受賞棄不顧遷建寧府司理改知福清縣邑故號難治前令多以罪去士端始至慨然以公勤自勵曰是豈不可爲哉不一歲竟坐公事免官初士端赴同安任與朱子爲代朱子一見傾倒如舊識及卒朱子銘其墓謂其才足自奮仕而不遭云

陳豐字宜中仙遊人父驥元符三年進士歷官宗學博士時附蔡京者皆得美官驥與京同里不肯一見外除通判温州以清白聞秩滿致仕卒豐初以父蔭補建州戶曹旣而魁本路漕薦紹興十八年登進士復中博學

宏詞科差教授泉州丞相陳康伯薦豐學識高明足以通達國體文章典雅足以潤色皇猷召除敕令所刪定官會敕局有所纂修供職者例得改秩豐不欲躁進辭以疾士論高之明年冬書成奏上改宣教郎累遷國子博士時宰執皆知已豐每進見必推引寒畯未嘗及私時諫官疏論司業張洙監丞李石學錄田興宗詞連豐豐遂與三人同罷未幾起知惠州孝宗登極監司以循吏舉除知南恩州莅官清儉無絲毫擾民爲歌曰君不見恩平太守賢優游治郡如烹鮮適歲旱禱祠有云願微臣特捐數年之壽俾闔境普沾三日之霖天果大雨是歲卒於官囊無餘貲民爲巷哭立祠子二諱諒諒見文苑傳字友仲以父蔭補官調永春縣尉改簽書清海軍判官移知古田縣未幾通判循州慶元初遷知潯州舊時士冒江灘之險附試於藤諒始申省部立貢院潯士德之安撫使李大異嘉其能辟知象州卒於官

林一鳴字聞卿仙遊人紹興中以父正蔭補官歷遷司農寺主簿以兄一

飛爲侍御史湯鵬舉所論一鳴並坐罷乾道末梁克家當國起知南雄州
移知惠州請發常平倉賑糶饑民奏罷賣口食鹽淹造鹽鈔紙官酤爲民
病者十數事復爲文諭民力學種麥墾荒田修陂塘去喪樂禁屠牛等事
去日惟圖書數篋而已終知常德府

謝洪字範卿興化人父穆倜儻有大志市書甌越建經史閣藏之列畫漢
晉間隱君子自圖形其間號鼇軒主人洪聰悟絕人自童卯已有文名穆
嘗以事忤縣令洪亟走救之令指庭中梅曰能賦此乎洪操筆立就令異
之擢紹興三十年進士調惠州海豐主簿督賦吏多取於民曰鈔頭錢洪
亟除之調信州永豐縣丞郡守林枏以莊厲臨僚屬獨引洪到幕下一旦
偶有所不樂遂引歸賡徐寅人生幾何賦以見志

陳洙字聖涯甌寧人嗜學刻苦博通羣書登隆興元年進士初試南宮胡
銓奇其文欲以魁多士詘於異議不果後以銓薦厯知壽州安豐縣大興
學校括廢田以養土修築芍陂水利邑民賴之性好施予家無贏餘有以

貧苦貸者鬻產不靳官終奉議郎

楊夢齡字子壽晉江人父世永見忠節傳初世永官高要維以夢齡自隨及歿於陣夢齡年方十四以侍父任當祿位夢齡乞改奏兄桂齡從之紹興二十七年第進士調温州瑞安縣丞攝縣事歲疫聚病者千餘於僧舍捐俸資爲藥粥日親察視悉賴以活浚復塞之河數百里後宰藉以冒賞終不言改知平陽縣縣有河下流歸海斗門頽壞水溢泄俱爲患夢齡捐錢五十萬倡其役旣畢工民生祠之秩滿當路交薦欲處以六察赴行在道卒民爲哀金扶柩以歸

莊方字邦直晉江人隆興元年進士監富沙鎮稅會興化守擅放民租詔轉運司覈實判官王佐委方往方援汲黯矯制事以對且謂減放皆實惠守得釋方尋辟福建安撫司主管機宜文字朝議請更福建鹽鈔事下帥司方歷陳不可遂寢尋知昭州改瓊州政尙廉靜萬安黎爭田守擅興師致敗坐累罷歸後起京西參議卒子枏枏字子修以父任補官荆湖制置

使趙方器之辟信陽州判官攝守事北兵圍城與戰破之改羅山令建言
遷治霸山朝議是之乃依萬弩關築山砦北兵至扼關擊之擒其木牌郎
官尋通判江陵府海櫃久廢枋修復之築櫃入隘口十三增濬三海益兵
守隘以時停泄改知峽州終江東安撫司參議官

顏幾字子治龍溪人歷仕多在海外安黎蠻有功就改京秩海外諸洞剽
掠昌化軍幾討平之詔改昌化爲南寧因命守之就除瓊管安撫奏變差
役爲僱役及請舉士照四川例與殿試陞等推恩士民懷之立祠焉顏世
居青礁原屬龍溪今爲海澄人

林士蒙字子正龍溪人父昌篤於教子士蒙以周禮三預鄉書登淳熙五
年進士初調歸善主簿再調梅陽推官廉以律已嚴以馭吏民甚德之改
知東莞縣

上官粹中字德厚邵武人隆興元年以累舉試策特奏名入第調武岡軍
僉判永州零陵有重囚獄久不決提刑司檄粹中往讞片言而定囚感服

秩滿改知廣州增城縣勤恤民隱獎進士類重農桑之勸抑催科之擾轉
運副使林光朝上其治行於朝

林雱字德溥莆田人以父深之蔭補明州刑曹掾及管檢法議刑時郡守
毛友治尙嚴峻雱決讞一不徇阿友首薦之歷知杭州錢塘湖州安吉二
縣遷宗正寺丞通判福州

陳諤字元昌侯官人以蔭補潭州攸縣尉改知紹興府餘姚縣訟牒以千
數決遣無停浙東仍歲凶儉獨餘姚民無菜色遷知潮州潮陽縣前攝事
者爲一切苟簡之政諤不憚煩刷去之捐俸錢修黌宇士氣爲一奮尋通
判興化軍卒於官

黃由庚字道卿建安人乾道中知南康軍時猾吏姦民表裏夤緣由庚正
其詭弊人不敢欺嘗置學田以贍士旣去民立祠祀之

李岐字穉山崇安人父昇官連城有宦績岐登乾道二年進士調隨州應
山縣尉攝邑事會歲凶創利民倉以備賑給繼知襄陽縣捐俸代五等戶

輸納稅役民甚德之通判金州經總兩司財賦實賴焉先是軍餉不以時
支岐處置得宜按月請給軍卒便之殿帥田世卿郭杲等交章薦特差權
州兼安撫除知南雄州至郡首書忠廉公恕四字於治壁以自勵時貧民
客戶以納丁米爲苦岐悉奏免官至朝散大夫

虞大中字士朋崇安人乾道五年進士知隆興府新建縣通判汀州皆有
惠政嘉泰間除知循州陞辭進慈幼恤孤等事先是大中家居朱子創立
義倉常與討論至是言及之到官廉潔自持教化盛行民鮮犯法改知南
康軍吏白庫有羨錢萬緡守例得之大中卻去不問嘉定中遣使會計諸
路大中供張如常時坐忤卽上章丐間不俟報而歸後起提舉江西常平
不赴

邱隲字克盛崇安人篤學不仕有行誼鄉里皆敬重之乾道中陳俊卿以
觀文殿大學士判福州隲上書謁見俊卿與語大器之淳熙五年俊卿改
判建康薦隲於朝授嚴州司戶參軍監建康椿積庫兼節制使庫諸司糧

料斛院隲籌畫有方公私交便軍旅不乏俊卿復欲援登於朝隲覩時事日非引年謝事俊卿稱其出處不苟云

方烜字成章惠安人少治周易兼長詞賦登乾道五年進士調賀州教授新學舍立規約月書季考訓迪甚勤鄰寇發將及境守倅倉皇無策烜至部健卒出城南登高望寇所在以示武旌旗蔽天賊宵遁改教授建寧未上卒

范機字純之劍浦人乾道初以父任爲甌寧主簿轉撫州司法參軍移在池州江左旱蝗流民襁負相屬機擇僧舍閒曠者分處之第給錢粟皆有法調懷安縣丞改知秀州崇德縣有中貴人銜命至邑致餽於機卻其餽弗報故例訟者有鬻紙錢里正有展限錢以供廚傳冗費機曰胥窮民以市虛譽吾弗忍爲悉罷之有盜牛殺人而逸者尉逮其鄰抑使誣服機察其冤釋之移尉使求真盜尉大詣怒白部使者詆機縱盜機不以辨無何他邑獲之尉乃慙服俄知潭州寧鄉縣值太兵屯漢上軍用百需率分配諸邑

機調度有方無毫髮病民是冬金兵犯襄陽圍安陸聲搖湖湘間父老請
徙邑以避機曰制動當以靜敵安能遽及吾圍今倉皇委去是自擾也卒
不爲動官撫使檄兼幕府機所親勸其緣此自脫機曰吾寧橫身以庇民
不忍擇利以棄民辭不往既而饑疫並作死亡枕藉機調救貧羸收育孩
穉所活不可數計辟湖廣總領所幹官嘉定八年以通直郎致仕卒年八
十有一機性和而介梁克家守建寧趙汝愚守福州機時爲屬吏二人皆
器重之及克家汝愚當國機以調選至都城率從吏部銓注闕足不履二
人門韓侂胄建議開邊中外臣僚莫敢出此言機獨隱憂憤歎作詩以諷
衆爲機危機弗顧也

許巽字少陽仙遊人

案仙遊有兩許巽熙寧六年登進士者乃穰之子志
佚其字亦無據此字少陽者別一許巽閩書俱收

入穰子巽
內非是

以禮學魁鄉薦第乾道五年進士歷知惠州歸善縣滴尉有捕

民爲盜者巽驗問非實不爲理尉囊橐上下必欲成賞郡守入其說廷詰

巽巽曰行法在太守執法在有司守不能強巽遂縱遣之民皆舉手加額

曰生我者父母再生我者知縣也調提點坑冶司主管文字坑冶使者宋之瑞欲以書薦巽令條上泉幕利害巽辭曰某書生安敢言利之瑞益敬服秩滿累遷祕書郎請補外知滁州時監司及鄰郡皆有互送每月不下三百餘緡巽以非法所當得盡歸之公帑胥吏畏服有以白金餽吏吏不敢受曰祕書知之措身何地除提點刑獄固辭乞郡改知漳州未上召赴行在卒於道巽嘗言居官以清字作根本鶉衣藪食便了一生何暇積聚爲子孫計人號爲耐貧翁官終朝散大夫子彥爲嘉定元年第進士

柯春卿閩縣人淳熙間宰袁州宜春縣莅事精敏剖決不倦郡守張枸雅重之遷邑庠於秀江後倅大府有能聲

林采字伯玉閩縣人淳熙中知遂昌縣新學舍請還贍學金於郡括匿稅田於鄉以廩士旬有課季有考學者翕然向風核隱戶定稅名置都籍事無不舉

陳華字日華福清人淳熙五年知嚴州淳安縣時詔行州郡行義役法華

集大姓諭之皆聽命縣有古渠久淤塞華身工築鍋溪館以延使客民使之塑像祀於學

江叔豫字子順永福人父伯虎兼文武材淳熙八年武舉第一人十一年復試禮部登進士第歷官通判泉州叔豫以父任調宜黃縣尉獲劇盜三十餘人邑上諸郡郡吏邀賂沮格叔豫不與秩滿注邵武法曹而歸提刑司陳天宜閩實嘉歎薦於朝改廣東南海縣丞安撫使畱射委攝番禺有聲俄南海亦闕令民相率詣臺闕乞還復攝本邑權知龍溪縣遷昭信軍節度判官叛卒方張叔豫應變出奇皆就擒郡有兄弟訟者久未決叔豫折以片言俱感泣去尋通判興化軍攝郡事境內稱治安撫使曹幽轉運判官王伯大露章交薦移武岡軍通判洞蠻入寇叔豫嚴保伍勵隅總郡境晏然尚書趙以夫奏叔豫才可備緩急朝廷方以瓊寇爲憂遂改通判瓊州淳祐十一年卒於官年六十有六子渙龍迪功郎漳州益陽縣尉會龍寶祐四年正奏名未廷對卒

韓璧字廷玉長樂人淳熙閒官廣東有聲經略使廉其績表知瓊州正田
畝之籍薄鹽米之征絕官吏之無狀者日以禮義廉恥開諭百姓躬行阡
陌勞來不怠行之期年民吏浹和化外黎民聞風感慕至有願供田稅比
省民者復以海外少知學新其州學而教之士皆脫其記誦文詞之習由
是人材日起未幾擢廣東南路提舉常平

葉文炳字晦叔浦城人淳熙十一年進士授晉江主簿需次家居致書請
益於朱子及至官朱子自漳浦還語以莅政治民之法文炳悉遵行之曾
詔內外從臣舉可爲職事官者郡守顏師魯以徐誼陳傅良等應詔文炳
與焉調劔浦令改筠州錄事獄舍湫隘遇暑溽囚多疫文炳擴而新之由
是無疾死者前後守寬猛不同文炳隨機規勸不以上官喜怒爲輕重政
以平允郡失公用器下掌吏於獄推鞫守欲鍛成之文炳以迹狀未明請
緩其事久之盜獲守媿謝改知仙遊縣嘉定八年秩滿造朝有旨許
曾作縣人言事文炳條人才臧否戰艦姦弊楮券便宜三事以獻除通判

和州將之官以父喪歸明年卒年六十有七
楊孝定字仁靜浦城人以外祖蔭補滁州全椒縣丞轉邵武軍錄事參軍
歷隆慶府靖安池州銅陵信州弋陽三縣民有兄弟訟財孝定降階執手
泣諭之曰以財物之微傷手足之愛同氣連枝義如是耶皆感泣退不復
訟孝定事母至孝母卒廬墓終喪鄉閭稱之

趙悰字彥忠晉江人父思誠官至待制知泉州因家焉悰以蔭補官調福
建轉運司主管文字以鹽法病民請恤竈戶均敷額歲衍鹽二百萬觔後
知惠州惠前號豐郡後稍窘悰曰必吏欺也覈之得米七千觔錢五萬緡
公帑既羨斥其餘以惠民最聞歷提舉常平卒於官子誼知臨江府富陽
縣說知南恩州

林谷字聲之

閩書作閩縣
人家泉州

晉江人淳熙十四年進士甲科歷知紹興府上

虞縣通判嚴州以倪思薦召赴都堂審察時韓侂胄當國有挽谷輸金爲
壽者谷歎曰書生攻苦俸錢尙不敢多取焉有以奉權要徑注潮州通判

而去谷善審訟或疑其以數鈎索谷笑曰吾何術臨事心無私繫而已人以爲名言子顯奉議郎知寧化縣

王克恭字彥禮南安人淳熙十四年進士教授循州以禮義迪後進改知寧德縣治最聞除通判廣州海寇掠境盛夏暑泄力疾督師擒其酋辟知新州奏減丁米以寬民力累遷度支駕部郎中祠歸起知興化軍在任六月卒子道翁歷知潮州海陽縣

上官賁字濟叔邵武人淳熙五年特奏名調饒州浮梁縣丞郡以事送委予決盡得其情陂塘渠堰多所修築遷貴州推官致仕手不釋卷歲散困米以濟貧族

劉起晦字建翁莆田人淳熙五年進士調福清主簿改知信州貴溪縣爲政寬平不爲節限訟者從容各盡其辭已而敷折剖決情僞如見民未嘗不避影斂迹也市里寒貧者起晦必知名數雨雪凍仆計口散給錢米縣東建孤獨廬西建安樂坊歲減斛面米六千石糴本錢六十萬貴溪人德

之每稱起晦必曰吾翁云尋辟江西安撫司機宜召試祕書省正字其人適在言路誣奏僞學罷之開禧元年卒貴溪民間起晦喪罷市聚哭方泳之字潛深莆田人初名芹之字子實改今名登淳熙十四年進士紹熙末教授衡州秩滿差充西外宗學教授嘉定初知建昌軍南豐縣縣帑空乏軍司督責甚急乃自詣郡求歸守降階挽留爲豁其半居歲餘撙節浮費抑罷科斂民甚德之改知岳州巴陵縣賦入尠少泳之磨撫甚至縣以稱治

方阜鳴字子默莆田人祖于寶紹興十六年應詔進風騷大全集補迪功郎終漳浦縣尉父秉白隱居教授當孝宗朝提刑司以孝廉薦不起莆人所謂草堂先生者阜鳴少擅聲律淳熙間選補太學生以禮義廉恥謂之四維命題阜鳴奏賦第一嘉定元年由特科奏名調淮安軍鹽城縣尉會歲饑制置使下令賑濟郡議半糶阜鳴乞全濟以檄行淮陰寶應二縣初置局縣市阜鳴令析局爲七由是遐僻皆沾惠尋監泰州海安鎮秋毫不

苟取去日舉例券九千緡歸之有司以薦改簽書平海軍節度判官兼南
外睦宗院主簿移簽書鎮南軍節度判官適秬價偶平酒吏請秋輸以秬
代阜鳴曰秬貴秬賤常也今俾灌輸後永爲例矣郡守滕強怒矍然止勿
行先是官令城中鹽肆各出鏹易楮有鹽僧魏彬者謂括責南昌新建口
岸三十處如城中法阜鳴曰口岸異城市小販非巨賈鏹將安出卒罷括
責阜鳴負場屋盛名白首筮仕勤民憂職所至上官皆驚曰平生聞方子
默尙在州縣乎爭薦之在平海軍時真德秀適知泉州阜鳴嘗言滅門刺
史破家縣令此衰世事古人惟云愷悌君子民之父母而已德秀爲之擊
節始阜鳴改秩以格不得入縣既佐二府又以格不得入倅德秀每以仕
晚用小爲阜鳴憾阜鳴不以介意也後兩奉祠積階散郎紹定元年卒
子械字景楫以父蔭調邕州司法未上由浙曹鄉薦登端平二年進士第
赴邕秩滿辟循州教授改知福清縣謁郡帥陳塏塏迎勞曰君方子默子
耶誦四維賦不脫一字遂爲知己始至帑庾如洗械遇逋賦不忍用笞朴

民反相率樂輸復新學舍剏經史閣及先賢祠以燈錢七百緡助養士最聞通判臨安府改通判汀州家居需次寶祐五年卒年六十

傅大聲字仲廣仙遊人淳熙十四年進士授福州淳王簿調貴州教授禮部尚書黃由舉天下教官以大聲爲第一改知武平縣催科不追而財賦自辦遷通判循州適寇起守稱疾大聲調發諸軍悉力鏖戰戒潰去未幾餘黨復熾諸司專委大聲督捕大聲乃上禦賊數策轉運使劉彊學躋之頒行於廣東十四州遂劾守不職以大聲攝州事尋奏爲真守闔城懽呼曰傅父再畱吾屬有依矣前數月郡圃有老松數株日出紫氣如雲騰空而上及大聲拜守人以爲德政所感守上日有例冊錢于緡卻之郡倉米斛過大手自較定減小之在循四年民樂其政相率立祠官至朝奉大夫子瑜通直郎通判靜江府

吳珏字仲玉興化人淳熙十四年特科出身調廣州南海縣尉以捕盜應格改承務郎知龍巖縣遷簽書寧國軍節度判官有嫠婦無子或以戶

絕告將沒入其貲廷曰利毫末以絕人將墜之緒仁者不爲也請聽其立嗣改通判漳州未行而卒

李大訓字君序閩縣人父士龍仕至奉直大夫直祕閣老居里中後生考德問業者應之無倦色大訓初以父蔭補同安縣丞縣奸豪受民賦與吏相表裏賦不以時入大訓課吏籍其姓名與所受之數按籍以索不擾而辦轉吉州廬陵縣丞適大旱獄囚淹滯提刑司檄大訓慮囚有以峒寇繫者七十餘人大訓鞫得正犯十餘人餘皆平民官軍掠之以邀功獄具上捕盜者力爭庭下大訓正色曰將官殺人軍前則獄官不得與今旣付獄是非曲直當聽有司君安得輒爭乎所活五十餘人有尹四者或謂賊曾不當釋大訓辨其非後數日果有執尹四而至者峒寇猖獗勢連湖廣萬安邑連寇境大訓攝其事密調義丁戍兵備之賊不得逞而去郡委大訓往湖南議夾攻之策潭帥曹彥約喜其材畱大訓偕行討賊迄事始歸調贛州安遠令會吉之龍泉尙有負固跳踉者監司交辟大訓知縣事旣至

民反相率樂輸復新學舍剏經史閣及先賢祠以燈錢七百緡助養士最
聞通判臨安府改通判汀州家居需次寶祐五年卒年六十

傅大聲字仲廣仙遊人淳熙十四年進士授福州王簿調貴州教授
禮部尚書黃由舉天下教官以大聲爲第一改知武平縣催科不
迫而財賦自辦遷通判循州適寇起守稱疾大聲調發諸軍悉力鏖戰戒
潰去未幾餘黨復熾諸司專委大聲督捕大聲乃上禦賊數策轉運使劉
彊學躋之頒行於廣東十四州遂劾守不職以大聲攝州事尋奏爲真守
闔城懽呼曰傅父再畱吾屬有依矣前數月郡圃有老松數株日出紫氣
如雲騰空而上及大聲拜守人以爲德政所感守上日有例冊錢于緡卻
之郡倉米斛過大手自較定減小之在循四年民樂其政相率立祠官至朝
奉大夫子瑜通直郎通判靜江府

吳珏字仲玉興化人淳熙十四年特科出身調廣州南海縣尉以捕盜應格
改承務郎知龍巖縣遷簽書寧國軍節度判官有嫠婦無子或以戶

絕告將沒入其貲廷曰利毫末以絕人將墜之緒仁者不爲也請聽其立嗣改通判漳州未行而卒

李大訓字君序閩縣人父士龍仕至奉直大夫直祕閣老居里中後生考德問業者應之無倦色大訓初以父蔭補同安縣丞縣奸豪受民賦與吏相表裏賦不以時入大訓課吏籍其姓名與所受之數按籍以索不擾而辦轉吉州廬陵縣丞適大旱獄囚淹滯提刑司檄大訓慮囚有以峒寇繫者七十餘人大訓鞫得正犯十餘人餘皆平民官軍掠之以邀功獄具上捕盜者力爭庭下大訓正色曰將官殺人軍前則獄官不得與今旣付獄是非曲直當聽有司君安得輒爭乎所活五十餘人有尹四者或謂賊酋不當釋大訓辨其非後數日果有執尹四而至者峒寇猖獗勢連湖廣萬安邑連寇境大訓攝其事密調義丁戍兵備之賊不得逞而去郡委大訓往湖南議夾攻之策潭帥曹彥約喜其材畱大訓偕行討賊迄事始歸調贛州安遠令會吉之龍泉尙有負固跳踉者監司交辟大訓知縣事旣至

招集流亡一意撫摩朝廷繼兩稅大訓復奏寬年限大軍衛戍大訓議不
可無備請置隴頭寨以捍外寇畱戍兵五百以護縣郭人情始安青草明
坑二峒素桀鷲或議勦之大訓招其酋長千餘人至具勞之諭以禍福皆
泣謝去曰李知縣非欺人者相與勒石筍峯頌大訓德且誓不敢負用薦
者改知歸善縣

林岳字仲山古田人紹熙元年特奏名嘉泰閒守全州甫至郡即定先賢
祠祭禮時清湘書院久廢岳捐貲修葺復建率性堂日偕諸生講明道學
勉以實行在郡九年多惠政去日民祀之柳侯廟

張彥清字叔澄浦城人少孤力學登紹熙元年進士調光澤主簿彥清素
從朱子學得其大指至官復與朱子友李呂遊所造益深歲大饑郡以賑
恤事屬彥清措畫有方全活甚衆改教授全州遷吉州安福縣丞安福有
廣陂溉田數千頃年久廢壞豪右私其利彥清請於郡而復焉陂成田以
常稔會峒蠻竊發距縣不百里彥清佐縣令聚兵以防蠻偵知有備引去

俄傳寇且至同僚有懷印欲遁者彥清曰寇來否未可知吾曹一搖足亂先作矣既而傳者果妄郡檄彥清行視永新既至見餓民盈路請加賑卹未報而令彥清督其租彥清歎曰此豈催科時耶以情諭於州及提刑司得勿督轉運司歲糴諸郡彥清謂兵事未息白使者請罷之民逋酒息錢以數十萬械繫纍纍不能償復白弛所負皆見聽汀州有疑獄提刑司令彥清鞠之微服徒行訪田野間具得囚寃狀至獄破械將釋之吏持不可彥清弗聽巡尉及初鞠官懼得失入罰以希賞詆彥清彥清曰吾欲雪無辜爾賞非吾志也未幾他邑獲真殺人者彥清亦絕口不自言以薦知處州慶元縣甫至而目眚作然兩造在庭猶諍之至前兒女語之人人得吐情實吏束手不能銖髮欺以疾請祠主管台州崇道觀仕雖久家無旬日儲歲暮貧且迫里人有欲餉之者彥清曰得錢固所欲然非吾本心卒不受常被檄試士福州時僞學之論方譁同列以是發策士子希主司意爭

祇嘗先需多青蜀反詩議不何者與其選陳自強之未顯也校文於建彥

清其所取士也後爲光澤丞年老矣無刮目者彥清獨事之
附韓侂胄驟貴銳欲鉤致彥清弗屑自強語人曰張叔澄太強項不可收
抬親故或以尤彥清及自強敗始歎服

趙汝做字唐卿晉江人商王元份八世孫紹熙元年與父善新弟汝傑同
登進士郡守表其里曰三秀歷官通判德慶府築隄障晉康江互三十里
先是瀕江之田數淫於澇至是爲上腴擢知賓州築城覆之以屋居民舊
皆江汲汝做於城鑿七井民便之遷提舉廣東市舶終提舉常平茶鹽

黃夔字一之晉江人父旦以武舉登淳熙五年第知欽州卒夔以父任知
貴州林宜等七州所至以廉惠稱月入例券多不取宜溪蠻爲暴部刺史
辟爲守夔至郡殲其渠魁諸峒納款事聞遷三秩五嶺瘴惡仕者數十待
去夔往來三十年家人皆無恙郡守黃朴表其里曰慶遠

薛舜俞字欽父同安人紹熙元年進士充江西轉運司幹官召赴都堂審
察除吏部架閣以言者罷復起幹辦江東提舉常平公事偕其長李道傳

賑荒多所全活改知婺州金華縣守督宿逋苛峻舜俞引誼力爭寬期示
信民悉樂輸罷歸卒舜俞問學淹貫議論挾負才氣以是仕數齟齬第舜
庸字惠父紹熙四年進士調龍溪縣尉以賞改隆興府分寧縣丞嘉定開
知古田縣通判興化軍未上卒

吳炎字濟之邵武人登紹熙元年進士乙科調桂陽軍教授環郡皆搖炎
不鄙夷其人講切磨濯絃誦彬彬旁境聞風多來學者地遠且貧士或不
能偕計吏炎積餘廩哀衆力置貢士田前相余端禮判潭州與湖南諸監
司合薦於朝詔與掌故京秩嘉泰二年除戶部架閣遷武學學諭開禧元
年改太學博士時韓侂胄專國炎不樂官京師乞補外添差建寧府通判
請祠王管台州宗道觀初炎與麗水章良肱同朝相善嘉定初良肱
第良能拜御史中丞舉炎自代被召詣闕而良能已除參政問炎所欲炎
曰食議幕之祿足矣良能曰吾何辭以白吾兄遂除知江陰軍時方更楮
法吏奉行新例甚峻炎陛辭極論其弊且曰民心向背社稷存亡繫焉開

邊挑敵曩嘗失天下之心矣奈何更持不恤之論行一切之政積令者斥
干令者誅大吏倡之小吏迎之臣恐人心動而國勢隨之矣別疏言士風
饜墨宜復祖宗治贖吏舊法引公儀休毛玠事以諷當軸之貪者詞旨剴
切無所顧避前一日所親任希夷在詞掖詣炎商對語炎拒不答疏出希
夷始大媿服江陰以邑爲郡歲入常不給賴柏稅支吾後改稅務隸嘉興
炎請復之寬征嗇用以其餘力葺郡學貢闈繕築黃田閘資民灌溉治績
爲浙西諸郡之最七年除監温州炎固請小壘改知興化軍復以老乞休
主營崇禛觀改千秋鴻禧觀十四年卒年六十有九官至朝散郎炎少敦
學長宦遊所入皆以奉尊老均兄翁色粹而莊言簡而遠若甚和易而有
毅然不可犯者終其身不汲汲進取歷仕二郡自下車奏記時宰外比去
不再通名其清介恬靖出於天性也子垠蔭授通直郎知甌寧縣

卓先字進之莆田人幼遊同邑林光朝門諸先生往往避席年十五拔鄉
試紹熙四年特奏名調龍溪縣主簿遷永慶軍節度推官郡守嘉先治

行欲畀以京削先曰吾素無榮望故心平而氣和一開其端方寸擾擾自此始矣辭之改廣州增城縣丞常可否邑事長官賴以寡過移建寧府節度推官晚乞祠歸貧無甌石客至必命酒高歌不以空乏介懷同邑陳必鄭燠皆敬重之紹定二年卒年八十有四

李起渭字肖望閩縣人自起渭以上寬厚樂施予得長者稱凡五世起渭登慶元五年進士歷豐州戶曹教授長州辰士素弗嫻文藝而博士舍又距學遠師弟子不相聞起渭斥校士所得例錢台俸餘更剏之士始得親師樂業改知安豐軍安豐縣時兵革甫息四野多遺骸擇高燥地瘞之招輯流民來歸者日相踵茅欄竹屋易以瓦木力不足者官爲營造聽民輸餼直以居歲當郊太常符下供鹿腊起渭念民罷未紓作詩以諷於朝之知已者事得寢縣故無城起渭請躬率兵民興築給以廩食冬而作春而息農無違時役不告病越三年城成先是戍卒散處編氓間人病其擾起渭創爲新營軍民不相雜朝命糴粟實邊起渭深懲科配諸弊行以不擾邊

儲告實益出公錢市其贏豫爲賑恤備明年大旱蝗出粟平糶復使買人
金使四出招糴訖事塗無餓殍自旁郡流離來者亦賴以全活會新守至
入吏言常賦外徵求甚急起涓力爭數四拂守意遂丐崇道祠以歸
鄭良臣閩縣人嘉定十年進士淳祐二年知潮州民苦白丁錢舊時據籍
取辦雖死徙不得蠲豁良臣易籍更編民賴以安復增田租於學宮及韓
山書院爲養士費官終太常博士潮人祀諸名宦祠

黃沐之長溪人慶元二年進士調婺州義烏縣尉土豪寇竊見尉少年易
之沐之約其屬協力搜捕賊有鐵彈子者負險格敵沐之躬拔其穴縛以
歸州守檄視民田意在增賦沐之爭之卒減十之六七擢上杭縣令去日
不持一錢改知處州麗水縣有上戶賦役欲移下戶沐之曰下戶實不堪
命方將總究賦源至程式以惠來者未成而卒

林光裔福州人嘉定十二年知贛州雩都縣周知民隱舉行荒政邑俗多
溺女光裔儲米爲舉子倉積俸爲舉子錢貧民生女者鄰里以聞先給錢

米養產母閱月抱女至庭驗視月給米三斗至週歲而止行之數年全活甚衆

詹師文字叔簡崇安人慶元二年進士調徽州婺源縣尉時境內盜發師文率士兵捕獲之不上功以希賞嘉定八年再調江西提刑司檢法官治獄無冤及赤水嗣寇鄧亞九等謀亂檄師文討平之秩滿授西外宗正以歸杜門教子與真德秀鄒應龍交遊不復仕子夢璧寶祐四年登第

詹淵字景憲崇安人慶元五年進士調臨江軍戶曹俗健訟案牘有數十年不決者淵一閱皆得其情凡所予奪人無異論部使者知其材檄致幕府於是瓊十一郡之民有求質於有司者咸請屬淵因爲之語曰寧爲戶曹非不願他官直秩滿用薦者循儒林郎授國子監書庫官將上而親歿服除差監行在車輅院未赴而卒淵嘗以博學宏詞試於春官既中選以嫌黜遂棄去從朱子遊得修己治人之大致其仕也孜孜所職惟恐後焉

陳梓字處恭甌寧人祖扁紹興八年進士歷信州通判會詔發州兵戍江
淮衆憚行欲爲變扁方攝守取首謀竄之遂帖然以朱倬薦被召郡人陳
康伯在朝乞且畱治所除知信州加直祕閣遷提舉淮東常平茶鹽公事
乾道間參政劉珙再薦除江淮坑冶鑄錢使梓擢慶元五年進士紱轉贛
縣丞時郴州寇李元礪作亂峒獠因之懷反側州守擇屬官慰撫無敢行
者梓願往深入峒中開誠曉諭獠酋感服與梓同詣州州守欲殺之梓力
爭不得棄官去同列勉畱獠酋得全後州有事於諸峒峒獠拒曰必得陳
丞乃可遷知信豐縣改鄉郡寧化縣以薦擢知南恩州卻例錐有持一鹿
獻者如直以償江寇竊發移鎮南安軍寇相戒不敢犯士民肖像祀之擢
江南西路轉運使屬部餽驢輒斥去曰官以監司爲名受所監賂可乎就
領安撫司事歲饑力講荒政引致米商卒爲稔歲蠲所節縮金貯爲寄椿
庫漕計遂裕官終朝請大夫

王沂之字春伯晉江人以門蔭歷新州有惠政將去民遮留累日移守

瓊州邵例册錢貸民租卒於官沂之曾祖秉嘗立義齋延師晦士厥後寢廢沂之遺命子起震繼其志闢齋於家之南捐田三百畝爲備脯資真德秀之泉善之爲定規條曰王氏義塾

陳景魏晉江人知柔從孫以蔭補信州鉛山主簿歷廣州新會丞擢贛州會昌令石城寇竊發景魏請於郡守乘機掩捕破其寨擒其酋餘黨悉平改知潮州潮陽縣縣歲輸丁銀至郡例增耗曰錠頭錢景魏曰此小民無窮之害亟裁去及解郡守謂不如例盡械邑吏景魏曰令裁之當罪令守乃釋吏尋召提轄文思院出知惠州決疑獄剔蠹胥案牘一清惠經兵燬後公私赤立景魏痛節縮修復學宮官廨以餘力葺白鶴故居合江樓六如亭歲大饑上言民瘵未瘳乞減惠民糴米三之一改知韶州以言者罷主管雲臺觀起知英德府白於帥請增浚泚口戍兵以防猺寇帥不從未幾猺覆浚泚始如其策增戍

傅烈字承仲南安人以易學名家登慶元五年進士歷南劍惠州教授矩

獲整飭改知南雄州保昌縣擢通判循州憫屬邑抑配鹽鈔之擾招誘商販平直售之不取贏以自潤民懷其惠差知梅州未上卒

許巨川字東甫一作楊甫同安人嘉定七年進士歷廣州建康教授以伊洛之學訓士崔與之自蜀歸深爲後進得師喜改知廣州東莞縣作新學宮給沒官田以贍士子每公務暇躬至黌舍與諸生講解治民附摩軫切計使劉克莊閱其斷訟稱其仁至義盡先是廣士建巨川生祠於泮宮及是東莞民亦倣郡庠建祠祀焉改主管坑冶司文字辟守象州卒

莊王字子中惠安人嘉定元年進士調温州永嘉縣尉鹽寇掠境提刑司符夜至王不待白郡亟發卒偕巡檢率寨兵俘盜數輩上謁守楊簡怒其擅命欲行軍法建燾會僚屬立王與巡檢燾下巡檢懼叩拜祈免王屹立不動通判以下皆爲請曰尉權以濟事可旌也簡意解同僚強王拜謝王竟不拜拂衣去諸臺壯其節交薦之終惠州海豐令

顏楠字養正永春人開禧元年進士歷藤州教授調會昌令改廣州南海

令因威濟惠盜寇斂迹通判循州遷知梅州贛寇陳三槍率萬眾逼梅城四十二日櫓激勵將士分隅拒守又合蜚船布水陣攢矢射之賊遁帥上其功會病卒

鄭思忱字景干安溪人少好學授尚書於西溪李季辨解精析生徒常百數邑令陳宓重之屢延署中講學嘉定三年詞賦首鄉薦歷新州新興令除遺利錢三百萬改知崇安縣復均惠倉以譖左遷浦城縣丞謁真德秀德秀與語知其賢言於郡守得復任擢知南恩州辟充浙東安撫司參議官雷變上封事言士溺苞苴習久難化民坐困且盜宜去貪恤民節用蓄力除監登聞檢院卒子必中興化軍通判

鄭輪字景行德化人嘉泰二年進士調南雄州保昌縣尉獲強盜不論賞曰人命可易官乎遷贛州龍南令邑上鄉鄰山峒民舊不輸租一日數十輩載錢而至吏驚怪詰之對曰聞有好長官願爲王民移知建昌府南城縣盜發于江諸邑擾動輪悉意撫摩無附賊者歷廣東轉運司主管文字

擢知循州

梁克俊字叔明泉州人嘉泰初知循州積公帑數千修城葺學循人以其有功於民祠於縣治其後同郡趙善諱字安之繼知循州勤恤民隱而除其害易茅屋以瓦民病涉則爲之梁邦人德之爲立生祠焉

羅博文字宗禮一字宗約沙縣人父彥溫知甌寧縣博文甫周歲家人示以晬盤博文扶服取性理書展玩久之祖疇作文以記其事且喜曰是兒當以文學大吾門十餘歲喪父用祖蔭授福州司戶參軍嘉泰二年第進士調靜江府觀察支使郡爲嶺徼以西一都會常時幕府已不勝煩博文裁處從容各得其理是時秦檜專權士大夫竄斥南來者相踵博文悉善遇之廩俸竭則鬻衣服以濟其乏改知贛州瑞金縣始至歲歉先事儲備及饑發廩賑贍厝置織密吏莫敢以出入欺復請推其餘以及旁縣全活甚廣縣故多盜博文飭巡徼設方略得渠酋數人置諸法境內帖然張浚都督江淮辟爲幹辦公事博文舊從同郡李侗遊侗聞其就辟也喜謂朱子

曰張公高明閱大而宗禮以精密詳練佐之幕府無過事矣孝宗嗣位覃恩轉通直郎賜五品服浚使募兵江西和糴建康皆有成績及浚再入相賓客例出幕府除知和州未上而吏部侍郎汪應辰制置全蜀奏辟博文爲參議官應辰虛心好問博文亦推誠啓告成都政績最天下嘗銜命漢中撫勞將士帥司以禮遺錢二百萬博文辭不獲命還次漢州州方泝貢院博文以五十萬予之餘悉輸成都公帑取河南二程遺文與他名臣論奏纂述可以垂世者募工鋟板用之略盡橫渠張載子孫避地流落貧不自振博文訪得之爲言應辰延置府學俾蜀士知所勸乾道四年秩滿丐祠王管台州崇道觀命下而應辰亦召還博文與之俱行至嘉州而卒年五十有三博文沈靜寡欲年未三十卽屏遠聲色一榻蕭然惟樂善不倦聞天下之士有一言一行之幾乎道不遠千里求之視人患難困乏如切於身救之必盡其力旣得侗所授河洛之傳喟然歎曰儒佛之異無他公與私之閒耳由此沛然自信守之益堅朱子嘗稱畸以清德重天下而博

文復能以道學行誼世其家云

趙善封字德可龍溪人太宗四子簡王元份七世孫登慶元二年進士歷知寧德縣崇學校課農桑中外大臣交章列薦尋通判肇慶府釐民間業去產存之患民受其惠擢知容州移知鬱林州廣右帥臣以善封有風力檄率滕梧等六郡之兵討賊方就道賊已聞風而散爲政寬平廉潔安撫使楊長孺嘗贈以詩有清如玉壺水澹若朱絃瑟之句

姚東字明仲龍溪人慶元二年進士調長溪縣王簿適大旱禱卽雨民喜曰此主簿雨也令丞解被火獨簿解存人以爲誠愛所格再調保昌丞當道知其廉介屢以疑獄見委囚不敢欺以通直郎致仕

楊仕訓字尹叔漳浦人少孤刻厲自奮嘗從同邑陳景肅受業及朱子守漳置賢齋以處士之志於學者仕訓年最少預焉朱子稱其學已知方龍溪王邁見而異之妻以女慶元二年登進士第初調古田縣尉再調潮州海陽縣丞政以寬和爲主不爲震厲立威名民有訟者先以禮義曉譬多

釋所爭而去遷永福令帥司交章以最薦遂差監鄂州糧科院荆襄兩路軍儲皆屬焉未踰月卒官至宣教郎年五十有八仕訓持身謹恪一笑語不妄發痛親早亡事祖母至孝平生好調人急而自奉儉甚卒之日囊橐蕭然無以爲斂總餉者義之率僚屬賻其喪以歸弟仕謹登嘉定十三年進士任惠州博羅縣尉與仕訓同稱賢吏云

上官必克字復之邵武人愔曾孫也事母孝謹慶元五年以積舉推恩特奏名監成都府都稅務稽察精明洞燭情僞吏無所容姦課額增羨視常歲十倍二三諸司薦其材行調泉州錄參

張汝明

邵武志云舊志張作謝非

字晦叔建寧人嘉泰二年進士歷郴州宜章令邑有

飛虎軍調馭頗難汝明結以恩信遂帖服武靈侯廟巫數十輩號神老妖言惑衆每迎奉涉水濟託言神不樂從橋入邑令必避堂居否則大災民爭獻幣恐後汝明諭衆曰神欲民安不宜令民濟水令與神分理幽明神宜居寺舍祭在誠不在物其以蔬果奠神老志謂災且及令汝明聞之

下神老於獄誠曰災則熱汝以謝神老皆泣拜具伏邑竟無災遷通判漢陽軍時行公田法汝明躬閱四郊雨雪不渝以故吏不得通賕而稅以償被檄董築黃州城汝明建議城外磨旗山敵至可瞰城中請築外城環之黃州民賴焉辟四川總領司幹官卒於道

方武子字景絢莆田人慶元初試太學生以周九府圖法命題士非素講多窘倉卒武子奏賦第一既而登五年進士調潮州潮陽縣尉有某士謁索不饜所欲適轉運使黃景說厯境士造飛語投牒武子乞辨誣景說呼某士則已遁矣由是重武子秩滿謁南銓注循州教授武子前嘗校藝於循發策士不能對至是口講指授文風一變郡守欲畀京削武子遂與族人長樂令世京守高其義會推官徐郊坐假前守薦牘爲帥所發疑武子譖之媒孽於他司遂免去方信孺漕廣西辟爲鬱林州博白令改梧州判官尋與象州法曹趙以夫皆延致幕下梧州闕守當次攝武子固辭提刑使者謂梧凋敝非方景絢不可至則大蠲弛負痛自節縮補總漕通網支

兵吏積餉郡計以舒未幾卒貧不能歸葬於潮

王自成

閩書英舊傳作必誠非是必成乃自成之兄官終寧德令非合翁源也成字從言亦誤

字志可莆田人父進

之紹興三十年第進士歷知常德府嘉定閒自成以父任爲徽州黟縣尉比去邑無盜蹤調南劍州司理遷知韶州翁源縣先崇禮教患邑少孺捐俸葺學以倡厲之立墟市行保甲通商弭盜俗以甦息不半載卒初徽守趙希遠南劍守朱端常嘗以狀薦自成自成殊不汲汲故莫有繼薦者或爲移書求職司自成寅架上書生塵卒不取觀

顧孺履字君謀莆田人嘉定四年與弟孺俊同登進士孺履調潮州司口未上丁母憂服闋調高要主簿遷陽江令歷知劍浦縣用薦改簽書江陰軍判官再改廣東轉運使主管文字入監左藏西庫丐外知英德府修學宮拓試闡教民陶瓦易茅以避火災郡人德而祠之帥司交薦移知瓊州兼安撫都監海南無白米斛折錢二十餘千孺履鑄其估民大悅先是牧守不能綏靜諸蠻激變生事孺履至開諭黎蠻責其自新皆叩頭感泣俄

而西黎涂白洞復出爲亂孺履其罪令東黎率諸洞討之遂俱屈伏經
略使李曾伯上功狀晉陞一秩曾伯謂賞未酬勞乞以身所轉一官讓孺
履不報劇盜烏流鱗久爲海道患依外國爲窟穴屢勦捕莫能獲孺履設
奇策擒酋黨數百人朝議再增二秩孺履貽起居舍人陳顯伯及劉克莊
書曰年高恐死海外請毋轉秩生入玉關可乎顯伯克莊相率堂白得召
還入對頗條時弊除軍器監丞未幾以風聞去主管武夷山冲祐觀寶祐
二年卒積階至朝議大夫子紹午梅州程鄉主簿紹庚廣州新會縣尉紹
申廣州番禺主簿

林沅字伯東莆田人祖大鼎官至吏部尙書父寶儉知賓州沅以父遺恩
入仕調廉州司法丁母憂郡守使謂曰掾更旬日書第二考矣吾爲掾周
旋印歷可乎沅泣辭曰懷欺不忠匿哀不孝非所敢爲也服除監廣州鹽
倉倉膏腴聞天下仕者皆滿載而歸沅取俸外錢別儲之比去以輸公帑
轉運使聞之駭曰廉吏也率監司交薦之除知梅州程鄉縣有治績綱役

錢八千緡石壁寨姦民葉八聚衆販鹽剽掠先是提刑捕逐不能得沅設重賞禽送經略府梟三人盜斂跡嘉定十六年卒於官

郭子力字景行仙遊人開禧元年進士調肇慶府教授時郡守事掎斂子力從容箴之守感悟且薦於朝再調惠州教授杖文程鄉監試欲私所親以賄囑子力子力正色拒之其人忿恨置毒於酒子力夜夢神爲滌其腸毒卒不行官終潭州通判

鄭可復字彥修仙遊人嘉定七年進士授婺州東陽縣尉縣人喬行簡方處要路族黨撓法可復守正不少徇行簡深器之改婺州教授再調福州除知潮州潮陽縣尋通判循州官至朝奉郎可復性儉樸他無所嗜祿俸餘貲悉以市書手自編錄至老不輟

趙紉夫閩縣人宗室子紹定四年以贛州贛尉攝雩都縣時石城尉黃元仲僭號狂逞紉夫葺城濠爲守禦賊圍城登臺射之稍退率兵追北擒元仲繫於市明年還職父老磨石紀其功從子時儋景定中亦知雩都會稽

下賊廖四猖獗勢將逼城時儋在道聞警疾馳至邑募義丁勸富民出貲給兵食與賊戰大破之斬其渠縱火焚賊砦殆盡

黃崧閩縣人紹定中知南雄州政先教化尤重表揚忠節久旱禱雨歷三晝夜跪求果得雨歲以大稔秩滿遷廣東提舉常平奏蠲本州歲上供銀三千餘民祠祀之

彭彥堅字國器閩侯人端平中知循州轉運使檄令敷糴彥堅請減五千斛轉輸之費不以累民復節縮錢數十萬作新學舍免佃丁困夫役者五十餘家隸學以供營繕具

朱挺字烈仲閩縣人端平中知循州治以風教爲先行鄉賓舉課試習俗丕變復申明節制以御六戍適外寇至挺遣兵捕之斬獲殆盡

李若水閩縣人寶祐閒知循州龍川縣以儒飾吏寬猛適中修泮宮營廨宇繕倉庫築城百需咸出公帑毫不擾民

陳琥字少嚴閩縣人寶祐元年進士爲南豐令痛繩郡吏嘗曰民不得安

者吏爲之蠹也取吏之巨猾曰三陳者斷手足以令羣吏股票百姓歡呼有問者曰公以恕齋自號而竟不恕何也對曰吾恕於民耳吏可恕乎識者以爲名言同郡趙以孚字用甫寶慶初亦令南豐承嚴密之後一以儒雅寬大撫柔其民崇學校簡刑役邦人亦懷之

林畔閩縣人景定二年以太常丞攝惠州事嘗察盜得其情諭之曰人性未嘗不善汝亟自新因遺錢三緡釋之盜感泣自是境內無盜

葉莫字實之侯官人慶元二年進士歷潭州善化令改知處州遂昌縣修復經界民蒙其利遷宣教郎簽書武岡軍判官先是守臣司馬遵素庸懦兇卒蔣宗等倡亂剽掠居民三十餘家安撫使真德秀檄莫權攝郡事使圖之莫卒梟宗首餘黨亦同時就縛德秀上其功於朝尋差通判武岡軍後爲吏部郎中江西提刑終中奉大夫

陳塏字子顛侯官人襄曾孫占籍嘉興端平二年登第系官右文殿修撰知平江府兼淮浙發運使以戶部侍郎趙必愿舉最特轉一官遷大府卿

終端明殿學士謚清毅塏爲司農時上疏請進恬退斥容悅以勵士大夫廉恥知太平州請蠲諸郡災傷又發公帑代三縣輸折絲帛錢五十萬九千餘貫屢歷麾節軍民愛戴

陳介字方叟福清人不以場屋爲意人問故介曰吾早孤母子相依爲命何忍一日離膝下母喪服除始就舉開慶元年擢進士乙科時丁大全當國介廷對語切直考官懼而却之調衢州司戶始至卽卻砂地粳糯例錢秋場受納每石有買口錢二楮介笑曰口可買心可買乎撝去之果毅軍開郡守誅其渠洶洶未已委介詣營撫諭衆歡然曰是不受錢司戶吾曹敢不聽命其議死獄也必爲囚者求活死者求寃曰庶幾兩無憾也常山邑寇作介登陴守捍獨當寇所必攻事平辭賞格不受歲旱禱雨久未應介白於郡守曰旱之虐者天政之虐者人減五邑賦天必雨守弛其半雨立應在職三年四易守寬猛雖不同介隨事救正守無不敬重者秩滿擬以幕職辭不就外移潮州判官

卓洵字士直長樂人慶元閒知吉州泰和縣留心水利創置沿溪六閘灌田萬畝一方永食其澤

潘周伯字宗之長樂人蔭補將仕郎紹定初改郴州桂東縣丞桂東在萬山中爲湖南江西廣東三路門戶其民暴悍易動周伯推誠撫綏民安其政郴盜高垓寇桂陽機攝令事往救周伯曰解圍不如擣虛自提官軍義勇入戰賊洞中主簿何琛死於陣周伯氣愈厲相持巖谷數日出奇掩襲垓先奔諸黨隨潰帥司益知周伯能一以招撫委之周伯曰屈以力易得其心難吾爲張綱可也單騎造賊巢穴不以兵隨羣獠出迎拜曰我輩非敢弄兵自速禍常時不堪侵枉使我至此公生佛也今惟令是從周伯惻然曉以逆順禍福聞者相顧泣下送周伯還邑咸跪請曰公苟有命願盡死力以報諸峒聞風相繼聽命適寇大擾江西吉州守趙彥覃以檄求援周伯遣七甲義士助之盜首舒慶二自隕黃十五乞降事聞得旨因任改官理爲須人仍與陞擢差遣周伯於是儲粟治藥創立義冢使饑者病者

歿者有所資復請卹死事之家旌孝婦之節新學宮增教員蠻俗爲之
變添差通判潭州嘉熙元年蒙古犯邊邊帥檄召七甲三洞兵策應周伯
卽日就道點集壯勇八百人直抵壽昌突圍以進敵酋驚顧曰赤脚蠻兵
來矣遂退去詔轉三官秩滿除監左藏東庫丐外出知潯州周伯以嶺民
去朝廷遠疾痛不得上聞孜孜然如理家事蠲例券損浮費代民輸夏稅
一年安撫使謝達上周伯治行累數百言不報繼知韶州以父諱辭改知
靖州初周伯以守潯陞辭援漢唐蒙晉董元二事痛言蜀廣可通之路黔
鬱共下之江宜豫爲經畫及抵渠陽訪求大理蹊徑嚴加防遏未三月爲
侍御史周坦所論罷予祠王管崇道觀其後蒙古帥幹腹兵果由蜀江而
下人始服其先見尋擢廣東安撫司參議有諫官居寓里欲請大奚山墾
田同僚憚其聲勢矚斷閣筆周伯奮然曰此盜窟也居海中心昔在淳熙
爲朝廷憂甚久幸而鋤薙不許生聚種植其聞著在令甲是烏可許事遂
寢聞者躑之未幾請老卒於家

陳紱字若悔長樂人寶慶二年進士調贛州興國縣尉改泰寧主簿滯貧十年泉州守李韶以攝局招廣東轉運司黃樸以郡掾辟皆辭不往轉韶州司戶兼司法以廉平稱攝知仁化縣移攝樂昌祀周敦頤及程顥程頤朱子於學士經指授者多所成就再調提刑司幹辦公事薦知惠安縣陳容字公儲自號所翁長樂人端平二年進士初爲温州平陽令關道路通溝洫議賑糴修學宮時集諸生敷衍經義士風大變尋通判臨江軍去後人常思之理宗聞容才名召除國子監主簿賈似道欲招致幕下容酒酣輒卑侮之卒不往出知興化軍容詩文豪壯尤善畫龍世傳所翁龍

鄭士懿字從之寧德人七歲讀書過目成誦登端平二年進士時真德秀知貢舉得其卷曰經綸之才也初授始興教授遷婺州通判王柏雅加敬禮入爲太學博士出知武岡軍公明廉慎民服其化

吳勢卿字安道建安人寶祐中知處州大旱勢卿行義倉法計口勸分松陽盜起率義民勦平之尤留心學校親講四書西銘以淑後生

夙子興

後村居士集
作宿子興

甌寧人紹定五年進士初知河源縣以勦寇功遷知

贛州雩都縣視事之翼日盜起廣昌將迫境子興先事擒內應劇賊古八

盧五戮之集吏民議戰守義丁千人深入苦戰官軍乘之大殲其黨賊遁

去衆相賀子興曰未也土城庫惡盍改作乎率僚佐選隅總畚土杵基周

七百餘丈悉甃之事平復修縣庠及梅江書院夏旱先發官廩而後勸分

自郭達野置糶場五十餘所至秋乃止部使者鄭逢辰上其治行加一秩

葉湜字子是甌寧人以父任授邵州新化主簿調雩都尉有劇賊數十人

深入廣右爲蔬已乃易服遁歸湜廉知其根穴一日盡縛之提刑使者上

其事改承事郎補惠安縣丞改饒州安仁縣視雁鴛行常正色如鐵不少

假借至與士民語則如家人婦子相爾汝俾得盡所欲言兩造至庭一見

卽決吏不得邀賅請負者亦心服有重囚繫獄根連十餘家湜知爲黠胥

罔利計疏其事臺府盡釋之不期年閒蠲里正之擾罷科糶之害與凡別

吏蠹蘇民瘼者不一而足寶慶三年卒於官湜壯歲遊朱子門得以直養

氣之說磊落光明無所回隱自謂平生與賓客言皆可對妻子在惠安時適真德秀守泉湜與同僚李方子公晦皆爲德秀器重德秀嘗言曰公晦學邃氣平本經術明世用子是堅彊介直遇事無難意處劇無勸容他人所不能爲與所不敢者吾盡舉屬之二人勁易不同同歸於是子采娶方子女遂從方子學得其指歸歷迪功郎監行在贍軍激賞酒庫時賢以後來陳譁期之

吳一鳴字伯大劍浦人紹定五年進士爲潭州益陽縣尉帥李華聞其賢置幕中政事一委之復薦於朝累調德化令時康維新帥漕或謂之曰例三司歲得舉其屬一人公何獨不薦新曰留以待賢或曰賢者爲誰曰吳一鳴也卒薦之得調長樂始至見倉庫蕭然詢知其縣多上官寄苗糧官不敢督責故耳因歎曰官自我得之自我失之何憾時參知政事陳偉在朝一鳴撻其幹督糧甚急幹以告偉偉曰令爲誰曰南平吳一鳴也偉曰南劍亦有此人耶由是諸勢家聞之悉爲輸納乃廣學舍修官廨邑

八作歌誦之邑有盧尙書者被劫得賊所遺刀一鳴悉勞縣之鐵工出示之二工曰此某所作也命諸工還獨留詢之所爲作者乃泉州巨賈之徒也一鳴以計獲之一訊而伏後爲仇家所誣去任邑人號哭於道執政知其非罪復調臨安府簽判時樞密鄭清董修大內疾作諭一鳴之賢遂委代之官終浙東安撫司主管機宜

劉并字清叔寧化人端平二年進士調贛州會昌縣尉申警弓手離寇無敢往來嘉熙間轉運使王桎檄差臨州和買時朝廷降見錢充糴本地官皆易以楮并獨用所降錢後易楮者皆被論坐黜而并由此見知辟南安大庾令寇譚知海嘯聚提刑司檄并督捕擒之累調辰州判官移知贛州瑞金縣築城建學卓有能聲以平峒寇功就京改秩終奉議郎

劉成字孟容莆田人父彌邵附祖夙傳成登寶慶二年進士監慶元府苗米倉歷羅源令坑冶司檢踏官移知處州青田縣執法不阿豪強斂迹邑素無積貯成因水災請於監司郡守得沒官田歲入三百斛立平糶倉在

元 卷三十六
任三年清苦自勵汲汲以崇學校厚風俗爲先民懷其惠肖像祀之初歲
在慶元日有鄉宦干以私歲不應後鄉宦爲兩浙轉運使挾前憾欲文致
歲罪適青田人有仕在禁近者辟舉交上得無事轉宣化郎知古田縣道
聞父訃徒跣馳歸哀毀如常不數月卒

林演字景大莆田人少有聲鄉校秋賦輒不售晚由上舍生登淳祐十年
進士演爲諸生時屢叩閤上書論天下事及廷對指陳無隱以此屈居乙
科教授梧州不以荒遠鄙夷其士日召至學舍講肄復條敷鹽催契回易
權攝之類爲民患苦者以告帥司帥司笑曰冷官當清靜而已多言何爲
秩滿去官橐無南物再起荆湖南路提舉茶鹽司幹辦官未赴而卒

丁南一字宗傑莆田人伯桂仲兄伯杞子也幼誦漢書日萬字伯桂奇之
曰吾家白眉年十三有聲鄉校寶祐元年奏名別院廷試以累舉恩陞丙
科時年五十有七矣調懷安縣尉以介特忤上官被劾監南嶽廟尋
監廣州東莞稅務安撫使謝子強日司征非所以挽儒者欲處之他職薦

於朝會爲提刑所劾罷官貧不能出嶺嶠廣南士人多率子弟從學轉運使鄭協延爲廉泉書院山長及洪天錫至檄攝州教授未幾辭歸咸淳二年卒

此山是及為天陽主赫赫時多未法新揚文等二
 人相會其後因之於其蒲宜其未論出備制備雨士人各遂平亦治也

福建循吏傳卷三

元

陳天錫字載之福寧人以文學薦授本州學正繼爲泉州學正造大成樂鑄禮器籩豆簠簋率以法度繼簿南安升佐府幕每以興學崇化爲先累遷建陽縣尹不尙刑威重修廟學集孔子及從祀諸賢封號詔制勒碑於大成殿前以示學者秩滿以六事兼舉聞於朝加奉議大夫知福清州年未六十卽致仕優游鄉曲二十年有鳴琴集子五人俱能詩陽至舉賢良

汀州知事

閩書

許原閩人其父素業儒老爲里校師原自幼傳父學雖朴而頗贍於書多所觀覽爲詩與文務達其意而已疆土入職方有司強起赴鄉選召對吏部授明州府定海縣丞始至縣人以原盛年未更事易之及觀所爲始皆大畏服一縣聳然然上之人未知其果可以有爲也時時督責原不爲動於是西北用兵未已征需尙繁戈甲之改造旌棨之營置調發無虛日且

福建循吏傳卷三

福建通志

治瀕大海歲修治海舟難以數計而官直不時降或已降而爲吏胥所欺
隱每事第差民之中次者一二人以至其出納謂之庫子凡所費用皆令
其代輸期會迫促至日受榜笞不恤也以故歲弊民產恆數十家原惻然
曰是豈爲民父母意哉卽詣府請其直集里役之長分授之俾售其物次
第歸之庫爲召集人匠造之使如法吏皆不得有所與僅令持筆治文書
以防稽勘功成而民不知擾鄉人之不憚爲庫者蓋自原始也縣以業海
爲生自民船不出海所恃以存者獨田租然當民產無制里役無藝都鄙
之間常紛然不寧原曰救弊之急孰甚于此者乃取其田分計之受差之
家悉準田之多少田多者應重差田少者稱其出而不得以橫擾中下無
告之民賴少瘳其他宿弊則去其尤蠹民者餘皆一聽自新或有所笞罰
雖豪劇吏苟得萌孽一切摘發窮治之不恕諸吏視原皆側目至以他計
出原俾不久於位會慈溪闕令府檄原攝令事原治慈溪如定海興利除
害不一月而大治民以私讎被獲者吏受其賂而罪以旁連原微行得實

卒更其獄縣久不雨禱之白龍公不應後以策鉤致吏之梟狡者大書其背曰天不雨吏弊爲之也既而雨隨至縣乃大稔原色仁氣溫言若不出口及見義輒矯矯不可撓爲政去觚角紕雕琢以平易質實爲務而尤謹持其廉行每出入月俸必負以自隨一錢之費必已出民以飲食進悉却之有私致一肉於舟者則舉而投之江自奉寡約甚嘗屨徒步不問道里遠邇雖祁寒未嘗御靴襪衣服僅取蔽體日食飯一盂蔬二味非公享酒裁不入口視民如子女與之語欸欸若恐不得當其意至有甚惡乃始繩以法一日臺檄下憲府追原甚急老幼聞者咸錯愕比上道號泣而送者殆千人且慮乏行資無一人不懷金以至自府尹而下及縣之僚佐與他官之在城邑者亦皆割俸金馳贈於道左原悉謝遣無所受曰造次顛沛見人之所守縱死不易吾心矣抵京上之人卒明其非罪未幾乃還後數月當得代以父憂去

九靈山房集

游欽字敬仲崇安人幼受家學研精覃思求續前人至元閒用薦省授邵

武簿遷建陽知縣抗行厲廉寬嚴迭濟勤撫字緩催科邑人久而懷之卒之日士民奔哭其家

閩書

趙甫璫字榮卿晉江人宋宗室領鄉薦除知道州寧遠縣廉介有守愛民禮士人稱其政教任滿改新城以母老表辭歸侍得旨改知閩清後母喪服闋引疾不出

八閩通志閩書

林興祖字宗起

閩書作宗述

羅源人通詩易春秋登至治元年進士第授承事

郎同知黃巖州事遷知隨州平蔡寇濬淮源三年大治隨士爲之作知州木軒頌木軒興祖號也改知鉛山州豪民吳友文以造僞鈔致富賄通州縣復分遣惡少四五十人爲吏於有司伺欲告者輒先事戕之前後殺人甚眾奪人妻女爲妾民銜冤十餘年莫敢發興祖廉得其狀憤然曰此而不除安用民牧爲立賞募民首告俄有告獲二人併贓者鞠之欵成友文躬自至官爲之營救意可以重賂餌也興祖叱執之立下獄捕其黨二百餘人悉置諸法民大快之江浙行省丞相別兒怯不花薦諸朝至正八年

擇道州路總管會撞寇道州湖南副使哈刺帖木兒屯城外聞賊且逼將
退兵興祖夜馳詣其營說留之哈刺帖木兒以乏軍需爲辭必得鈔五千
錠桐盾五百乃可破賊興祖許之明日入城勸諭隨商代鈔五千錠取郡
樓舊桐板爲盾日中皆備哈刺帖木兒大喜遂留謀禦賊賊聞新總管一
日具五百盾以爲大軍且至日夕遁去興祖於是罷興作賑貧乏輕徭薄
歛治績爲諸州最永明縣洞徭屢竊發爲民害興祖以手榜諭之皆曰林
總管廉而愛民不可犯也三年不入其境春旱蟲食麥苗興祖爲文禱之
大雨三日蟲盡死人以爲德政所感年老致仕終於家

元史閩書

雷機字子樞建安人父德潤傳在儒行機由薦授邵武教諭登延祐五年
進士第授古田縣丞遷延平路總管府知事有能聲沙縣富民歿而子幼
族強暴欲據其業上下吏皆通賄訟久弗定委機鞠之竟白改邵武路總
管府經歷本路達魯花赤本西域人恃與廉訪司有連郡守議稍不合遽
引杖擊守守俛首遁機曰苟如此天子法安在遇獄有不平獨庭辯不少

屈調興化縣尹有土豪數家挾勢戕民機悉置之法人以雷神稱之轉湖
廣儒學副提舉月書季考具有成法擢延平路總管府推官順昌舟師因
利覆舟取人財獄成父子皆坐死機以子從父令白部使者杖遣之尤溪
有死獄株連者二十五人累歲不得釋機推罪之輕重亦杖遣之沙縣織
工子與張甲鬪鬪散子失足墮壑死吏入甲故殺罪機出之南平浮屠殺
其主寺僧浮屠之徒方九齡官以知情論死會朝廷遣使者宣撫入閩機
力言其非辜竟得釋汀州羅天麟作亂機立保柵集丁壯盜不敢犯徒惠
安縣尹賦役均平振興學校以禮讓化俗治行爲諸邑最代還民立祠樹
碑鄉井幾徧遷汀州路總管府推官築城開濠以資保障僉事申屠駟行
部至汀稔知機賢凡訟牒悉委之年七十乞休除翰林待制致仕至正十
一年卒階至朝散大夫機軀幹魁梧方面美鬣爲人嚴而不苟和而不流
居官尤盡心獄事每夜叅半孤燈熒熒繙閱成案不休曰人命至重吾不
敢忽也弟棋杭與機俱以易名於時學者稱爲雷氏易機子燧燦棋字君

寶至正二年進士調莆田縣尉以公廉正直稱壬戌歲因羅天麟亂委守海口卒於官杭字彥舟登元統元年進士歷武平縣尹調潮陽以死事贈奉化州知州官其子煜為同知燧字景陽登至正二十三年進士從仕郎大都路香河縣尹後入明授翰林院編修燦字景星至正元年舉於鄉十年再舉任泉州路途嶺巡檢閩中亂起兵助王師戰死贈上杭縣王簿官其子塉

宋文憲集閩書道光舊志

林以順字子睦莆田人積仁之後至治元年進士調慶元縣尹有弟殺兄而以賄免者以順發其獄按法誅之移浦江縣尹改台州路推官皆有善狀歷江西儒學提舉福清州知州時元政已熄所在盜起鍾二王小五劫殺鄉邑以計剪除之尋除福州路同知致仕

八閩通志

陳信惠字亨中晉江人試有司不利以才能應帥府辟從平漳寇累功授山巒澎湖蘆溪三寨巡檢轉南安主簿升南豐州判官省檄攝同安尹轉惠安多惠政調順昌縣尋以老疾謝事

八閩通志

諸葛晉字仲昭晉江人父元中以人材辟舉仕松江同知晉以明經授福建中書行省檢校兵興省檄分治尤溪縣鋤艾豪強有廉能稱首復朱熹書院之沒入豪家者豪家利僧田據有之晉悉取還僧以其半充書院贍士費明與徵聘不仕坐以前代官徙居潁上卒兄泰

泰字廷瑞以父蔭授汀州路明溪巡檢未幾告歸居家力學經傳多所發明四書大全諸儒姓氏列泰名

以上八閩通志閩書

王應祚字舜卿晉江人泰定間令邵武縣新縣治葺學宮恆以陳古靈令仙居者教民

閩書

朱文震字原道莆田人至順壬申賜進士出身擢同知瑞安州事大府檄文震均瑞安平陽永嘉之役不爲權沮財奪民服其平改汀州路總管府推官調甌寧縣尹行均役法上官以其舍人爲屬請緩之文震格不奉命上官怒誣構文震罪部使者廉其非辜獲免且以訟牒三百委文震治之文震從容剖答而退不能有言御史交薦於朝除福建宣慰司都事丁內

艱起知瑞安盜起旁境陷陶山天門諸堡募壯士攻破之斬其酋以徇颺
風挾海水漂民廬舍文寔發官廩按行漂所賑之以大臣奏授奉議大夫
福建儒學提舉逐其苟職者易以儒遷同知泉州路總管府事引年辭歸
以嘉議大夫泉州路總管致仕命未下卒有葵山集行於世

宋文憲集

徐賜順昌人爲汀州路掾史屬武平縣有僧殺人坐囚繫者眾賜承檄拘
眾立庭下詰之一僧錯愕失次就訊鞫之果殺人者眾獲釋遷建寧南安
巡檢時寇發民多流徙賜勸戮渠魁餘黨順服升寧德簿白部使者爲民
減增課官鹽民戴其德相與碑頌之後以延平路推官致仕卒

閩書

陳文積字崇善福寧人由蔭敘授永春簿歷四遷爲長泰縣尹公勤廉能
創築長泰縣城

閩書

方應元字長卿莆田人中書左丞烏古孫良楨時爲泉州推官器應元材
命爲刑曹吏盡心獄事唯恐情弗麗法有乖中典每蹙頰弗寧豫章一賈
豎與人有隙欲以僞造鈔誣之應元斥曰訊獄當兩造具備人奈何受爾

誣禍將不測矣果抵罪死尋爲南安縣蘆溪巡徼吏民毒溪以漁人飲溪流多誤死巡檢劉萬松雅敬應元命撰文以諭之應元痛言毒溪不仁讀者躋之積年勞當升吏于縣棄去冬月蚤作見有一夫號凍將死解衣衣之立春鞭土牛聚觀者如堵牆隸人執扑疾驅眾皆辟易一兒仆于地人爭踐之應元力以身捍蔽抱兒歸其父時應元子槐生尙幼是夕出遇奔馬急趨蹶道中馬躍而過無纖毫傷人以爲救兒之報云

宋文憲集

盧琦字希韓惠安人少從學於三山余子賢子賢語其友陳忠曰希韓經學該貫爲人簡重在吾門十餘年不見情容真畏友也從子賢試浙省子賢道卒琦不顧試期與其友陳彥博經紀以歸登至正二年進士第授延平路知事轉永春縣尹賑饑饉止橫斂均賦役減口鹽百餘引蠲包銀權鐵之無徵者時行鄉亭省田野見良禾嘉麥煦煦笑語召勞其人籬落不整溝洫不治者責其惰罰之兩造在庭則詰曰胡棄農而卽公庭立爲剖遣各愧服去迺作新學宮延師儒課子弟月書季考皆自臨較鄰邑仙遊

盜發逼境琦方行界上賊眾望拜曰永春大夫也爲大夫百姓者何幸之大乎我邑長以暴毒驅我故至此耳琦立馬喻以禍福皆投去刃槩一日得九百八十三人琦使之執渠魁以自新皆聽命自是威惠著於境外十三年泉郡大饑老幼扶攜皆就永春食琦分食諸浮屠若大家幼稚棄道者舟載養之存活不可勝計明年安溪寇數萬來襲永春琦出邑外諭民曰縣無城令當與存亡顧須我民共之我民能戰與戰不然令死之眾感憤獻欵曰使君我父母也忍以父母畀賊琦乃率與戰大破之明日賊分道大至民無老少皆以鋤梃瓦礫助擊大小三十餘戰捕賊眾千二百餘人而邑民無損傷鄰邑德化民相率拜馬前微公吾邑亦及矣居二年調寧德縣尹父老走帥府乞留不可爲立生祠先是寧德盜屢驚民走匿山谷聞琦至復歸盜亦逸去會興泉方用師帥府以琦著望永春檄衆謀軍事往來二郡閒卽以年勞擢行省照磨鹽課司提舉番鉅商以貨得衆省政威勢大振有睥意立筆楚脅戶部令奪下四場引鹽自爲市琦曰是上

棄國課下毒亭戶及食鹽民斷吾腕不署牒也作海口鹽場所晴文有乞
 賜兩月之晴甘捐十年之筭語場人誦之晚以近臣薦除守平陽命下而
 琦卒琦與陳旅林以順林泉生皆以文學為閩中名士元末以事赴京中
 道返曰不可為矣因太息不已歿後六年而元亡琦以毛詩學起家終元
 世泉人登第獨琦一人惠人多傳其詩學子杲入明以人才授鉅鹿知縣
 曷授廣平府通判 元史八閩通志閩書

陳駭字元甫閩縣人居方山至正中以學行薦補勉齋書院山長改潯漢
 場司丞辟行中書省職官掾西域那兀納等據泉州行省辟為護軍參謀
 軍事那兀納就縛檻送行省調晉江縣尹兼分督鹽課升廣東鹽課提舉
 兼參潮惠循梅諸州軍事既而歸田道由泉州父老固挽留之遂家焉晚
 築南湖墅社門謝事黃冠野服種蒔自給卒年七十有方山堂稿 閩詩錄
 蔡淳長泰人至正中賊萬貴與嘉禾千戶何迪立叛寇漳泉高指揮薦淳
 武勇與兵二千遣與賊戰賊益兵圍之三匝援兵至淳夾擊大破之上其

功升攝長泰尹事寇李角車叛淳單騎諭之賊歸歎尋升正尹 道光舊志

李睿字景明武平人至正閒尹上虞和易有守是非必折於理歲久旱周

視阡陌免其稅租嚴湖禁重兵防會世亂不能歸卒葬於上虞 閩書

迺穆泰字景春閩縣人至正末以延平路總管監南安縣時當寇亂調度

轉輸以給軍餉勞來綏輯以復流亡復以政暇修舉學校時稱良吏 萬姓

統譜

林仲嘉失其名閩縣人初舉孝廉為憲府書佐繼吏福清泉郡行部使者

左答納失里號明察其吏以過黜俾代行文書為漳浦照略賊猝至戒勿

犯林照略家授將樂典史考滿將謁選京師值世革病不服藥卒 聞過齋

集

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...

...
...
...
...
...